

नमो नमो निम्मलदंसणस्स
पूज्य आनंद-क्षमा-ललित-सुशील-सुधर्मसागर गुरुभ्यो नमः

On Line – आगममंजूषा

[११] विवागसूयं

* संकलन एवं प्रस्तुतकर्ता *

मुनि दीपरत्नसागर [M.Com., M.Ed., Ph.D.]

॥ किंचित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री [आनंदसागरसूरिजी](#) म.सा.ने किया था। आज तक उन्हीं के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।

*** मूल आगम-मंजूषा के संपादन की किंचित् भिन्नता का स्वीकार ***

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

-मुनि दीपरत्नसागर

: Address:-

Mnui Deepratnasagar,
MangalDeep society, Opp.DholeswarMandir,
POST:- THANGADH Dist.surendranagar.
Mobile:-9825967397 jainmunideepratnasagar@gmail.com

मुनि दीपरत्नसागर



श्रीविपाकदशाङ्गम् - तेणं कालेणं तेणं समएणं चंपा णामं णयरी होत्था वण्णओ, पुण्णभहे चेइए वण्णओ, तेणं कालेणं० समणस्स भगवओ महावीरस्स अंतेवासी अज्जसुह-
 म्मे णामं अणगारे जाइसंपण्णे वण्णओ चोइसपुव्वी चउणाणोवगए पंचहिं अणगारसएहिं सद्धिं संपरिवुडे पुव्वाणुपुव्विं जाव जेणेव पुण्णभहे चेइए अहाप-
 डिरूवं जाव विहरइ, परिसा निग्गया, धम्मं सोच्चा निसम्म जामेव दिसं पाउब्भूया तामेव दिसं पडिगया, तेणं कालेणं० अज्जसुहम्मस्स अंतेवासी अज्जजंबूणामं अणगारे सत्तुस्सेहे
 जहा गोयमसामी तहा जाव झाणकोटोवगए विहरति, तते णं अज्जजंबूणामं अणगारे जायसइढे जाव जेणेव अज्जसुहम्मे अणगारे तेणेव उवागए तिव्वुत्तो आयाहिणपया - (१३४)

५३६ विपाकश्रुतांगं, अज्जजंबू - १

मुनि दीपरत्नसागर

हिणं करेति ता वंदति नमंसति ता जाव पज्जुवासति ता एवं व०-१। जति णं भंते ! समणेणं भगवया महावीरेणं जाव संपत्तेणं दसमस्स अंगस्स पण्हावागणाणं अयमट्ठे पं० एक्का-
रसमस्स णं भंते ! अंगस्स विवागसुयस्स समणेणं जाव संपत्तेणं के अट्ठे पं०?, तते णं अज्जसुहम्मे अणगारे जंबू अणगारं एवं व०-एवं खलु जंबू ! समणेणं जाव संपत्तेणं एक्कारसमस्स
अंगस्स विवागसुयस्स दो सुयक्खंधा पं० तं०-दुहविवागा य सुहविवागा य, जति णं भंते ! समणेणं जाव संपत्तेणं एक्कारसमस्स अंगस्स विवागसुयस्स दो सुयक्खंधा पं० तं०-दुहविवागा
य सुहविवागा य पढमस्स णं भंते ! सुयक्खंधस्स दुहविवागाणं समणेणं जाव संपत्तेणं कइ अज्झयणा पं०?, तते णं अज्जसुहम्मे अणगारे जंबू अणगारं एवं व०-एवं खलु जंबू ! समणेणं
जाव संपत्तेणं दुहविवागाणं दस अज्झयणा पं०-‘मियाउत्ते उज्झयते अभग्ग सगडे वहस्सती नंदी । उंबर सोरियदत्ते य देवदत्ता य अंजू य १० ॥ १ ॥ जति णं भंते ! समणेणं जाव
संपत्तेणं दुहविवागाणं दस अज्झयणा पं० तं०-मियाउत्ते जाव अंजू य पढमस्स णं भंते ! अज्झयणास्स दुहविवागाणं समणेणं जाव संपत्तेणं के अट्ठे पं०?, तते णं से सुहम्मे अणगारे
जंबू अणगारं एवं व०-एवं खलु जंबू ! तेणं कालेणं० मियग्गामे णामं णगरे होत्था वण्णओ, तस्स णं मियग्गामस्स णगरस्स बहिया उत्तरपुरच्छिमे दिसीभाए चंदणपायवे णामं उज्जाणे
होत्था सव्वोउय० वण्णओ, तत्थ णं सुहम्मस्स जक्खस्स जक्खाययणे होत्था चिरातीए जहा पुण्णभदे, तत्थ णं मियग्गामे णगरे विजए णामं खत्तिए राया परिवसति वण्णओ, तस्स
णं विजयस्स खत्तियस्स मिया णामं देवी होत्था अहीण० वण्णओ, तस्स णं विजयस्स खत्तियस्स पुत्ते मियादेवीए अत्तए मियापुत्ते नामं दारए होत्था जातिअंधे जातिमूए जाति-
बहिरे जातिपंगुले हुंडे य वायवे, नत्थि णं तस्स दारगस्स हत्था वा पाया वा कण्णा वा अच्छी वा नासा वा, केवलं से तेसिं अंगोवंगाणं आगिई आगितिमित्ते, तते णं सा मियादेवी तं
मियापुत्तं दारगं रहस्सियंसि भूमिघरंसि रहस्सितेणं भत्तपाणएणं पडिजागरमाणी विहरति । २। तत्थ णं मियग्गामे णगरे एगे जातिअंधे पुरिसे परिवसति, से णं एगेणं सच्चक्खुतेणं
पुरिसेणं पुरतो दंडएणं पगडिडज्जमाणे २ फुट्टहडाहडसीसे मच्छियाचडगरपहकरेणं अण्णिज्जमाणमग्गे मियग्गामे णगरे गिहे २ कालुणवडियाए वित्तिं कप्पेमाणे विहरति, तेणं कालेणं०
समणे भगवं महावीरे जाव समोसरिते जाव परिसा निग्गया, तते णं से विजये खत्तिए इमीसे कहाए लद्धट्ठे समाणे जहा कूणिए तहा निग्गते जाव पज्जुवासति, तते णं से जातिअंधे
पुरिसे तं महयाजणसहं च जाव सुणेत्ता तं पुरिसं एवं व०-किण्णं देवाणुप्पिया ! अज्ज मियग्गामे नयरे इंदमहेति वा जाव निग्गच्छति?, तते णं से पुरिसे तं जातिअंधपुरिसं एवं व०-
नो खलु देवा० इंदमहे जाव निग्गए, एवं खलु देवाणुप्पिया ! समणे जाव विहरति, तते णं एए जाव निग्गच्छति, तते णं से जातिअंधपुरिसे तं पुरिसं एवं व०-गच्छामो णं देवाणु-
प्पिया ! अम्हेवि समणं भगवं जाव पज्जुवासामो, तते णं से जातिअंधपुरिसे पुरतो दंडएणं पगडिडज्जमाणे २ जेणेव समणे भगवं महावीरे तेणेव उवागते ता तिक्खुत्तो आयाहिणपया-
हिणं करेति ता वंदति नमंसति ता जाव पज्जुवासति, तते णं समणे० विजयस्स० तीसे य० धम्ममाइक्खइ० परिसा जाव पडिगया विजएवि गए । ३। तेणं कालेणं० समणस्स जेट्ठे
अंतेवासी इंदभूती णामं अणगारे जाव विहरति, तते णं से भगवं गोतमे तं जातिअंधपुरिसं पासति ता जायसड्ठे जाव एवं व०-अत्थि णं भंते ! केई पुरिसे जातिअंधे आय(जाइ)अं-
धारूवे?, हंता अत्थि, कहिं णं भंते ! से पुरिसे जातिअंधे जातिअंधारूवे?, एवं खलु गोतमा ! इहेव मियग्गामे णगरे विजयस्स पुत्ते मियादेवीए अत्तए मियाउत्ते णामं दारए जाति-
अंधे जातिअंधारूवे, नत्थि णं तस्स दारगस्स जाव आगितिमित्ते, तते णं सा मियादेवी जाव पडिजागरमाणी २ विहरति, तते णं से भगवं गोतमे समणं भगवं महावीरं वंदति नमंसति
ता एवं व०-इच्छामि णं भंते ! अहं तुब्भेहिं अब्भणुणाते मियापुत्तं दारयं पासित्तए, अहासुहं देवाणुप्पिया !, तते णं से भगवं गोतमे समणेणं भगवया० अब्भणुणाते समाणे हट्ठतुट्ठे
समणस्स भगवओ महावीरस्स अंतितातो पडिनिक्खमइ ता अतुरियं जाव सोहेमाणे २ जेणेव मियागामे णगरे तेणेव उवागच्छति ता मियग्गामं णगरं मज्झंमज्झेणं अणुपविसइ
ता जेणेव मियाए देवीए गिहे तेणेव उवागए, तते णं सा मियादेवी भगवं गोतमं एज्जमाणं पासति ता हट्ठ० जाव एवं व०-संदिसंतु णं देवाणुप्पिया ! किमागमणपयोयणं?, तते णं
भगवं गोतमे मियं देविं एवं व०-अहण्णं देवाणुप्पिए ! तव पुत्तं पासित्तु हव्वमागते, तते णं सा मियादेवी मियापुत्तस्स दारगस्स अणुमग्गजायए चत्तारि पुत्ते सब्बालंकारविभूसिए करेति
ता भगवतो गोतमस्स पाएसु पाडेति ता एवं व०-एए णं भंते ! मम पुत्ते पासह, तते णं से भगवं गोतमे मियं देविं एवं व०-नो खलु देवाणुप्पिए ! अहं एए तव पुत्ते पासित्तं हव्वमागए,
तत्थ णं जे से तव जेट्ठे पुत्ते मियापुत्ते दारए जातिअंधे जाव अंधारूवे जण्णं तुमं रहस्सियंसि भूमिघरंसि रहस्सिएणं भत्तपाणेणं पडिजागरमाणी २ विहरसि तं णं अहं पासित्तं हव्व-
मागते, तते णं सा मियादेवी भगवं गोतमं एवं व०-से के णं गोतमा ! से तहारूवे णाणी वा तवस्सी वा जेणं तव एसमट्ठे मम ताव रहस्सकते तुब्भे हव्वमक्खाते जतो णं तुब्भे जाणह ?,
तते णं भगवं गोतमे मियं देविं एवं व०-एवं खलु देवाणुप्पिए ! मम धम्मायरिए० समणे भगवं महावीरे जाव ततो णं अहं जाणामि, जावं च णं मियादेवी भगवया गोतमेणं सद्धिं

एवमद्वं संलवति तावं च णं मियापुत्तस्स दारगस्स भत्तवेला जाया यावि होत्था, तते णं सा मियादेवी भगवं गोयमं एवं व०-तुब्भे णं भंते! इह चेव चिट्ठह जा णं अहं तुब्भे मियापुत्तं दारयं उवदंसेमित्तिकट्टु जेणेव भत्तपाणघरए तेणेव उवागच्छति ता वत्थपरियद्वं करेति ता कट्टसगडियं गेण्हति ता विपुलस्स असणपाणखातिमसातिमस्स भरेति ता तं कट्टसगडियं अणुकड्डेमाणी २ जेणेव भगवं गोतमे तेणेव उवागच्छति ता भगवं गोतमं एवं वयासी-एह णं तुब्भे भंते! ममं (मए सद्धिं) अणुगच्छह जा णं अहं तुब्भं मियापुत्तं दारयं उवदंसेमि, तते णं से भगवं गोतमे मियं देविं पिट्ठओ समणुगच्छति, तते णं सा मियादेवी तं कट्टसगडियं अणुकड्डेमाणी २ जेणेव भूमिघरे तेणेव उवागच्छति ता चउप्पुडेणं वत्थेणं मुहं बंधेइ मुहं बंधेमाणी भगवं गोतमं एवं व०-तुब्भेवि य णं भंते! मुहपोत्तियाए मुहं बंधह, तते णं भगवं गोतमे मियादेवीए एवं वुत्ते समाने मुहपोत्तियाए मुहं बंधेति (बंधइ), तते णं सा मियादेवी परंमुही भूमीघरस्स दुवारे विहाडेति, ततो णं गंधे निग्गच्छति से जहानामए अहिमडेति वा जाव ततोवि य णं अणिट्ठतराए चेव जाव गंधे पण्णत्ते, तते णं से मियापुत्ते दारए तस्स विपुलस्स असणपाणखाइमसाइमस्स गंधेणं अभिभूते समाने तंसि विपुलंसि असणपाणखाइमसाइमंसि मुच्छित्ते० विपुलं असणं० आसएणं आहारेति ता खिप्पामेव विद्धंसेति, ततो पच्छा पूयत्ताए य सोणियत्ताए य परिणामेति, तं पि य णं पूयं च सोणियं च आहारेति, तते णं भगवतो गोतमस्स तं मियापुत्तं दारयं पासित्ता अयमेयारूवे अज्झत्थिते० समुप्प-ज्जित्था-अहो णं इमे दारए पुरा पोराणाणं दुच्चिण्णाणं दुप्पडिक्कंताणं असुभाणं पावाणं कडाणं कम्माणं पावगं फलवित्तिवसेसं पच्चणुभवमाणे विहरति, ण मे दिट्ठा णरगा वा णेरइथा वा पच्चक्खं खलु अयं पुरिसे नरयपडिरूवियं वेयणं वेएतित्तिकट्टु मियं देविं आपुच्छति ता मियाए देवीए गिहाओ पडिनिक्खमति ता मियग्गामं नगरं मज्झंमज्झेणं निग्गच्छति ता जेणेव समाने भगवं महावीरे तेणेव उवागच्छति ता समणं भगवं महावीरं तिक्खुत्तो आयाहिणपयाहिणं करेति ता वंदति नमंसति ता एवं व०-एवं खलु अहं तुब्भेहि अब्भणुण्णाए समाने मियग्गामं नगरं मज्झंमज्झेणं अणुपविसामि ता जेणेव मियाए देवीए गिहे तेणेव उवागते, तते णं सा मिया देवी ममं एज्जमाणं पासति ता हट्ठ० तं चेव सव्वं जाव पूयं च सो-णियं च आहारेति, तते णं मम इमे अज्झत्थिते० समुप्पज्जित्था-अहो णं इमे दारए पुरा जाव विहरति । ४ । से णं भंते! पुरिसे पुव्वभवे के आसी किं नामए वा किंगोत्तए वा कयरंसि गामंसि वा नगरंसि वा किं वा दच्चा किं वा भोच्चा किं वा समायरित्ता केसिं वा पुरा पोराणाणं जाव विहरति?, गोयमाई! समाने भगवं महावीरे भगवं गोतमं एवं व०-एवं खलु गोतमा! तेणं कालेणं० इहेव जंबुदीवे दीवे भारहे वासे सयदुवारे णामं नगरे होत्था रिद्धत्थिमित्ते० बण्णओ, तत्थ णं सयदुवारे नगरे धणवती नामं राया होत्था, तस्स णं सयदुवारस्स नगरस्स अदूरसामंते दाहिणपुरच्छिमे दिसीभाए विजयवद्धमाणे णामं खेडे होत्था रिद्ध०, तस्स णं विजयवद्धमाणस्स खेडस्स पंच गामसयाइं आभोए यावि होत्था, तत्थ णं विजयवद्धमाणे खेडे एक्काई नाम रट्ठकूडे होत्था अहम्मि ए जाव दुप्पडियाणंदे, से णं एक्काई रट्ठकूडे विजयवद्धमाणस्स खेडस्स पंचण्हं गामसयाणं आहेवच्चं जाव पालेमाणे विहरति, तते णं से एक्काई विजयवद्धमाणस्स खेडस्स पंच गामसयाइं बहूहिं करेहि य भरेहि य विद्धीहि य उक्कोडाहि य पराभवेहि य दिज्जेहि य भेज्जेहि य कुंतेहि य लंछपोसेहि य आलीवणेहि य पंथकोट्टेहि य ओवीलेमाणे २ विहम्ममाणे २ तज्जेमाणे २ तालेमाणे २ निद्धणे करेमाणे २ विहरति, तते णं से एक्काई रट्ठकूडे विजयवद्धमाणस्स खेडस्स बहूणं राईसर० जाव सत्थवाहाणं अण्णेसिं च बहूणं गामेल्लगपुरिसाणं बहूसु कज्जेसु कारणेसु य संतेसु य गुज्जेसु य निच्छएसु य ववहारेसु य सुणमाणे भणति न सुणेमि असुणमाणे भणति सुणेमि एवं पस्समाणे भासमाणे गेण्ह-माणे जाणमाणे, तते णं से एक्काई रट्ठकूडे एयकम्म एयप्पहाणे एयविज्जे एयसमायारे सुबहुं पावं कम्मं कलिकलुस समज्जिणमाणे विहरति, तते णं तस्स एगाइयस्स रट्ठकूडस्स अ-ण्णया कयाई सरीरगंसि जमगसमगमेव सोलस रोगायंका पाउब्भूया, तं०-सासे कासे जरे दाहे कुच्छिसूले भगंदरे । अरिसे अजीरते दिट्ठी मुद्धसूले १० अकारए ॥ २ ॥ अच्छिवेयणा कण्णवेयणा कंडू दओदरे कोटे १६, तते णं से एक्काई रट्ठकूडे सोलसहिं रोगातंकेहिं अभिभूते समाने कोडुंबियपुरिसे संदावेति ता एवं व०-गच्छह णं तुब्भे देवाणुप्पिया! विजय-वद्धमाणे खेडे संघाडगतियचउक्कचच्चरमहापहपहेसु महया २ सहेणं उग्घोसेमाणा २ एवं वयह-एवं खलु देवाणुप्पिया! एक्काई० सरीरगंसि सोलस रोगायंका पाउब्भूता-सासे कासे जरे जाव कोटे तं जो णं इच्छति देवाणुप्पिया! वेज्जो वा वेज्जपुत्तो वा जाणुओ वा जाणुयपुत्तो वा तेगिच्छिओ वा तेइच्छियपुत्तो वा एगातिस्स तेसिं सोलसण्हं रोगायंकाणं एगमवि रोगायंकां उवसामित्तते तस्स णं एक्काई रट्ठकूडे विपुलं अत्थसंपयाणं दलयति, दोच्चं पि तच्चं पि उग्घोसेह ता एयमाणत्तियं पच्चप्पिण्ह, तते णं ते कोडुंबियपुरिसा जाव पच्चप्पिणंति, तते णं से विजयवद्धमाणे खेडे इमं एयारूवं उग्घोसणं सोच्चा णिसम्म बहवे वेज्जा य० सत्थकोसहत्थगया सएहिं सएहिं गेहेहिंतो पडिनिक्खमति ता विजयवद्धमाणस्स खेडस्स मज्झं-मज्झेण जेणेव एगाइरट्ठकूडस्स गेहे तेणेव उवागच्छंति ता एगाइसरीरयं परामुसंति ता तेसिं रोगाणं निदाणं पृच्छंति ता एक्कातीरट्ठकूडस्स बहूहिं अब्भंगेहि य उव्वट्ठणाहि य सिणे-

हपाणेहि य वमणेहि य विरेयणाहि य (प्र० सेयणाहि य) अवदाहणाहि य अवण्हाणेहि य अणुवासणाहि य वत्थिकम्मेहि य निरुहेहि य सिरोवेधेहि य तच्छणेहि य पच्छणेहि य सिरो-
वत्थीहि य तप्पणेहि य पुडपागेहि य छल्लीहि य मूलेहि य कंदेहि य पत्तेहि य पुप्फेहि य फलेहि य बीएहि य सिल्लियाहि य गुल्लियाहि य ओसहेहि य भेसजेहि य इच्छंति तेसिं सो-
लसण्हं रोयातंकाणं एगमवि रोयायंकां उवसामित्तए णो चेव णं संचाएति उवसामित्तते, तते णं ते बहवे वेज्जा य वेज्जपुत्ता य० जाहे नो संचाएति तेसिं सोलसण्हं रोयातंकाणं एगमवि
रोयायंकां उवसामित्तए ताहे संता तंता परितंता जामेव दिसं पाउब्भूता तामेव दिसं पडिगता, तते णं एक्काई विज्जेहि य० पडियाइक्खिए परियारगपरिचत्ते निव्विण्णोसहभेसजे सोलसरो-
गातंकेहिं अभिभूते समाणे रज्जे य रट्टे य जाव अंतेउरे य मुच्छिते रज्जं च रट्टं च आसाएमाणे पत्थेमाणे पीहेमाणे अहिल्लसमाणे अट्टदुहट्टवसट्टे अट्टाइज्जाइं वाससयाइं परमाउं पाल-
यित्ता कालमासे कालं किच्चा इमीसे रयणप्पभाए पुढवीए उक्कोससागरोवमट्ठितीएसु नेरइएसु णेरइयत्ताए उववण्णे, से णं ततो अणंतरं उवट्टित्ता इहेव मियग्गामे नगरे विजयस्स
खत्तियस्स मियाए देवीए कुच्छिसि पुत्तत्ताए उववण्णे, तते णं तीसे मियाए देवीए सरीरे वेयणा पाउब्भूया उज्जला जाव जलंता, जप्पभित्तिं च णं मियापुत्ते दारए मियाए देवीए
कुच्छिसि गब्भत्ताए उववण्णे तप्पभित्तिं च णं मियादेवी विजयस्स खत्तियस्स अणिट्ठा अकंता अप्पिया अमणुण्णा अमणामा जाया यावि होत्था, तते णं तीसे मियाए देवीए अ-
ण्णया कयाई पुव्वरत्तावरत्तकालसमयंसि कुहुंबजागरियं जागरमाणीए इमे एयारूवे अज्झत्थिते जाव समुप्पण्णे एवं खलु अहं विजयस्स खत्तियस्स पुत्तिं इट्ठा धे(थे)ज्जा वेसासिया अणु-
मया आसी जप्पभित्तिं च णं मम इमे गब्भे कुच्छिसि गब्भत्ताए उववण्णे तप्पभित्तिं च णं विजयस्स अहं अणिट्ठा जाव अमणामा जाया यावि होत्था, नेच्छति णं विजए खत्तिए मम
नामं वा गोत्तं वा गिण्हित्तते, किमंग पुण दंसणं वा परिभोगं वा? तं सेयं खलु ममं एयं गब्भं बहूहिं गब्भसाडणाहि य पाडणाहि य गाल्णाहि य मारणाहि य साडित्तए वा०, एवं
संपेहेति त्ता बहूणि खाराणि य तूवराणि य गब्भसाडणाणि य खायमाणी य पीयमाणी य इच्छति तं गब्भं साडित्तए वा०, नो चेव णं से गब्भे सडइ वा०, तते णं सा मियादेवी जाहे
नो संचाएति तं गब्भं साडित्तए वा० ताहे संता तंता परितंता अकामिया असयंवसा तं गब्भं दुहंदुहेणं परिवहति, तस्स णं दारगस्स गब्भगयस्स चेव अट्ट णालीओ अब्भंतरप्पवहाओ,
अट्ट नालीओ बाहिरप्पवहाओ अट्ट पूयप्पवहाओ अट्ट सोणियप्पवहाओ दुवे २ कण्णंतरेसु दुवे २ अच्छित्तरेसु दुवे २ नक्कंतरेसु दुवे २ धमणिअंतरेसु अभिक्खणं २ पूयं च सोणियं च
परिस्सवमाणीओ २ चेव चिट्ठंति, तस्स णं दारगस्स गब्भगयस्स चेव अग्गिए नामं वाही पाउब्भूते जे णं से दारए आहारेति से णं खिप्पामेव विद्वंसमागच्छति पूयत्ताए सोणियत्ताए
य परिणमति, तं पि य से पूयं च सोणियं च आहारेति, तते णं सा मियादेवी अण्णया कयाती णवण्हं मासाणं बहुपडिपुण्णाणं दारगं पयाथा जातिअंधे जाव आगितिमित्ते, तते णं सा
मियादेवी तं दारयं हुंडं अंधारूवं० पासति त्ता भीया० अम्मधातिं सदावेति त्ता एवं व०-गच्छह णं देवा० तुमं एयं दारगं एगंते उक्कुरुडियाए उज्झाहि, तते णं सा अम्मधाती मियाए
देवीए तहत्ति एतमट्टं पडिसुणेति त्ता जेणेव विजए खत्तिए तेणेव उवागच्छइ त्ता करयलपरिग्गहीयं जाव एवं व०-एवं खलु सामी! मियादेवी नवण्हं जाव आप्पितिमित्तं तते णं सा
मियादेवी तं हुंडं अंधारूवं पासति त्ता भीया० ममं सदावेति त्ता एव व०-गच्छ णं तुमं देवा०! एयं दारगं एगंते उक्कुरुडियाए उज्झाहि, तं संदिसह णं सामी! तं दारगं अहं एगंते
उज्झामि उदाहु मा?, तते णं से विजए तीसे अम्म० अंतिते सोच्चा तहेव संभंते उट्ठाते उट्ठेति त्ता जेणेव मियादेवी तेणेव उवागच्छति त्ता भियं देविं एवं व०-देवाणु०! तुज्झं पढमगब्भे
तं जइ णं तुमं एयं एगंते उक्कुरुडियाए उज्झासि तो णं तुज्झ पया नो थिरा भविस्सति ते णं तुमं एयं दारगं रहस्सियंसि भूमिघरंसि रहस्सितेणं भत्तपाणेणं पडिजागरमाणी २ विह-
राहि, तो णं तुज्झं पया थिरा भविस्सति, तते णं सा मियादेवी विजयस्स खत्तियस्स तहत्ति एयमट्टं विणएणं पडिसुणेति त्ता तं दारगं रह० भूमिघर० भत्त० पडिजागरमाणी विहरति,
एवं खलु गोतमा! मियापुत्ते दारए पुरा पोराणाणं जाव पच्चणुभवमाणे विहरति । ५ । मियापुत्ते णं भंते ! दारए इओ कालमासे कालं किच्चा कहिं गमिहिति कहिं उववज्जिहिति?,
गोतमा ! मियापुत्ते दारए छवीसं वासातिं परमाउयं पालइत्ता कालमासे कालं किच्चा इहेव जंबुद्दीवे दीवे भारहे वासे वेयइढगिरिपायमूले सीहकुलंसि सीहत्ताए पच्चायाहिति, से णं
तत्थ सीहे भविस्सति अहम्मिए जाव साहसिते सुबहुं पावकम्मं जाव समज्जिणति त्ता कालमासे कालं किच्चा इमीसे रयणप्पभाए पुढवीए उक्कोससागरोवमट्ठिईएसु जाव उववज्जि-
हिति से णं ततो अणंतरं उवट्टित्ता सरीसवेसु उववाज्जिहिति तत्थ णं कालं किच्चा दोच्चाए पुढवीए उक्कोसेणं तिन्निसागरोवमट्ठिई० से णं ततो अणंतरं उवट्टित्ता पक्खीसु उववज्जिहिति
तत्थवि कालं किच्चा तच्चाए पुढवीए सत्तसागरो० ततो सीहेसु तयाणंतरं चउत्थीए उरगो पंचमीए० इत्थी० छट्ठीए० मणुओ० अहे सत्तमाए तत्तो अणंतरं उवट्टित्ता से जाइं इमाइं
जलयरपंचिंदियतिरिक्खजोणियाणं मच्छकच्छभगाहमगरसुंमुमारादीणं अद्धतेरसजातिकुलकोडीजोणिपमुहसतसहस्साइं तत्थ णं एगमेगंसि जोणीविहाणंसि अणेगसयसहस्सक्खुत्तो

उदाहृता २ तथेव भुजो २ पञ्चायाइस्सति से णं ततो उव्वट्ठित्ता एवं चउप्पएसु उरपरिस्सप्पेसु भुयपरिस्सप्पेसु खहयरेसु चउरिंदिएसु तेइंदिएसु बेइंदिएसु वणप्फतिकडुयस्सवेसु कडुयदु-
 द्दिएसु वाउ० तेउ० आउ० पुढवी० अणेगसतसहस्सकस्सुत्तो० से णं ततो अणंतरं उव्वट्ठित्ता सुपतिट्ठपुरे नगरे गोणत्ताए पञ्चायाहिति से णं तत्थ उम्मुक्कबालभावे अण्णया कयाती पढम-
 पाउसंसि गंगाए महाणदीए खलीणमट्ठियं खणमाणे तडीए पेह्लिते समाणे कालगते तथेव सुपइट्ठपुरे नगरे सिट्ठिकुलंसि पुमत्ताए पञ्चायाइस्सति से णं तत्थ उम्मुक्क० जाव जोवण-
 मणुप्पत्ते तहारूवाणं थेराणं अंतिए धम्मं सोच्चा निसम्म मुंडे भवित्ता अगाराओ अणगारियं पव्वइस्सति, से णं तत्थ अणगारे भविस्सति ईरियासमिते जाव बंभयारी, से णं तत्थ बहूइं
 वासाइं सामण्णपरियागं पाउणिता आलोइयपडिक्कंते समाहिपत्ते कालमासे कालं किच्चा सोहम्मे कप्पे देवत्ताए उववज्जिहिति से णं ततो अणंतरं चयं चइत्ता महाविदेहे वासे जाइं इमाइं
 कुलाइं भवंति अड्ढाइं० जहा दढपतिण्णे सा चेव वत्तव्वया कलाओ जाव सिज्झिहिति, सेवं भंते! २त्ति भगवं गोयमे०, एवं खलु जम्बू! समणेणं भगवता महावीरेणं जाव संपत्तेणं दुह-
 विवागाणं पढमस्स अज्झयणस्स अयमट्ठे पण्णत्तेत्तिबेमि । ६ ॥ इति मृगापुत्रीयाध्यनं १ ॥ जति णं भंते! समणेणं जाव संपत्तेणं दुहविवागाणं पढमस्स अज्झयणस्स अयमट्ठे पं०
 दोच्चस्स णं भंते! अज्झयणस्स दुहविवागाणं समणेणं जाव० संपत्तेणं के अट्ठे पं०?, तते णं से सुहम्मे अणगारे जंबू अणगारं एवं व०-एवं खलु जम्बू! तेणं कालेणं० वाणियग्गामे
 णामं नगरे होत्था रिद्ध०, तस्स णं वाणियग्गामस्स उत्तरपुरच्छिमे दिसीभाए दूतिपलासे नामं उजाणे होत्था, तत्थ णं दूइपलासे० सुहम्मस्स जक्खस्स जक्खायतणे होत्था, तत्थ
 णं वाणियग्गामे मित्ते नामं राया होत्था वण्णओ, तत्थ णं मित्तस्स रण्णो सिरी नामं देवी होत्था वण्णओ, तत्थ णं वाणियग्गामे कामज्झया णामं गणिया होत्था अहीण० जाव सुरूवा
 बावत्तरीकलापंडिया चउसट्ठिगणियागुणोववेया एकूणतीसविसेसे रमम्माणी एकवीसरतिगुणप्पहाणा बत्तीसपुरिसोवयारकुसला णवंगसुत्तपडिबोहिया अट्ठारसदेसीभासाविसारया सिं-
 गारागारचारुवेसा गीयरतियगंधव्वनट्ठकुसला संगतगत० सुंदरत्थण० ऊसियधया सहस्सलंभा विदिण्णछत्तचामरबालवीयणिया कण्णीरहप्पयाया यावि होत्था बहूणं गणियासहस्साणं
 आहेवच्चं जाव विहरति । ७ । तत्थ णं वाणियग्गामे विजयमित्ते नामं सत्थवाहे परिवसति अड्ढे०, तस्स णं विजयमित्तस्स सुभदा नामं भारिया होत्था अहीण०, तस्स णं विजयमि-
 त्तस्स पुत्ते सुभदाए भारियाए अत्तए उज्झियए नामं दारए होत्था अहीण जाव सुरूवे, तेणं कालेणं० समणे भगवं महावीरे समोसढे परिसा निग्गता राया निग्गओ जहा कूणिओ
 निग्गओ धम्मो कहिओ परिसा० पडिगओ राया य, तेणं कालेणं० समणस्स भगवओ महावीरस्स जेट्ठे अंतेवासी इंदभूती जाव लेसे छट्ठंछट्ठेणं जहा पण्णत्तीए पढमाए जाव जेणेव
 वाणियग्गामे तेणेव उवा० वाणियग्गामे उच्चणीय० अडमाणे जेणेव रायमग्गे तेणेव ओगाढे, तत्थ णं बहवे हत्थी पासति सण्णद्धबद्धवम्मियगुडिये उप्पीलियकच्छे उदामियघंटे णाणा-
 मणिरयणविविहगेविज्जउत्तरकंचुइज्जे पडिकप्पिते झयपडागवरपंचामेलआरूढहत्थारोहे गहियाउहपहरणे अण्णे य तत्थ बहवे आसे पासति सण्णद्धबद्धवम्मियगुडिते आविद्धगुडे ओसा-
 रियपक्खरे उत्तरकंचुइयओचूलमुह (प्र० चुडामुहा) चंडाधरचामरथासकपरिमंडियकडीए आरूढअस्सारोहे गहियाउहपहरणे अण्णे य तत्थ बहवे पुरिसे पासति सण्णद्धबद्धवम्मिय-
 कवए उप्पीलियसरासणपट्टीए पिणद्धगेवेज्जे विमलवरबद्धचिंधपट्टे गहियाउहपहरणे तेसिं च णं पुरिसाणं मज्झगयं पुरिसं पासति अवओडगबंधणं उक्कित्तकण्णनासं नेहतुप्पियगत्तं बज्झ-
 करकडिजुयनियत्थं कंठेगुणरत्तमल्लदामं चुण्णगुंडियगातं वुण्णयं (प्र० घुण्णतं) वज्झपाणपीयं तिलंतिलं चेव छिज्जमाणं काकणिमंसाइं खावियंतं पावं खक्कर(रक)सएहिं हम्ममाणं अणेग-
 नरनारीसंपरिवुडं चच्चरे चच्चरे खंडपडहएणं उग्घोसिज्जमाणं इमं च णं एयारूवं उग्घोसणं सुणेति-नो खलु देवाणुप्पिया ! उज्झियगस्स दारगस्स केई राया वा रायपुत्ते वा अवरज्झति
 अप्पणो से सयाइं कम्माइं अवरज्झंति । ८ । तते णं से भगवओ गोतमस्स तं पुरिसं पासित्ता इमे अज्झत्थिते०-अहो णं इमे पुरिसे जाव नरयपडिरूवियं वेयणं वेदेतित्तिकट्ठु वाणिय-
 ग्गामे णगरे उच्चनीयकुले जाव अडमाणे अहापज्जत्तं सामुयाणियं गेण्हति त्ता वाणियग्गामं नगरं मज्झमज्झेणं जाव पडिदंसेति, समणं भगवं महावीरं वंदति णमंसति त्ता एवं व०-
 एवं खलु अहं भंते ! तुब्भेहिं अब्भणुण्णाते समाणे वाणियग्गामे तहेव जाव वेएति से णं भंते ! पुरिसे पुव्वभवे के आसी० जाव पच्चणुभवमाणे विहरति ?, एवं खलु गोतमा ! तेणं कालेणं०
 इहेव जंबुदीवे दीवे भारहे वासे हत्थिणाउरे नामं नयरे होत्था रिद्ध०, तत्थ णं हत्थिणाउरे णगरे सुणंदे नामं राया होत्था महयाहि०, तत्थ णं हत्थिणाउरे नगरे बहुमज्झदेसभाए एत्थ
 णं महं एगे गोमंडवे होत्था अणेगखंभसयसंनिविट्ठे पासाईए० तत्थ णं बहवे णगरगोरूवाणं सणाहा य अणाहा य णगरगावीओ य णगरबलीवहा य णगरपडिडयाओ य णगरवसभा य
 पउरतणपाणिया निब्भया निरुवसग्गा (विग्गा) सुहंसुहेणं परिवसंति, तत्थ णं हत्थिणाउरे नगरे भीमे नामं कूडग्गाहे होत्था अधम्मिए जाव दुप्पडियाणंदे, तस्स णं भीमस्स कूडग्गा-
 हस्स उप्पला नामं भारिया होत्था अहीण०, तते णं उप्पला कूडग्गाहिणी अण्णया कयाई आवण्णसत्ता जाया यावि होत्था, तते णं तीसे उप्पलाए कूडग्गाहिणीए तिण्हं मासाणं बहु-
 पडिपुण्णाणं अयमेयारूवे दोहले पाउब्भूते-धण्णाओ ताओ अम्मयाओ जाव सुलद्धे जम्मजीवि(यफले) जाओ णं बहूणं नगरगोरूवाणं सणाहाण य जाव वसभाण य उहेहि (१३५)

य थणेहि य वसणेहि य छप्पाहि य ककुहेहि य वहेहि य कभेहि य अच्छीहि य नासाहि य जिम्भाहि य ओट्टेहि य कंबलेहि य सोल्लेहि य तलितेहि य भजितेहि य परिसुकेहि य लाव-
 णिएहि य सुरं च मधुं च मेरुं च जातिं च सीधुं च पसणं च आसाएमाणीओ विसाएमाणीओ परिभाएमाणीओ परिभुंजेमाणीओ दोहलं विणेति, तं जइ णं अहमवि बहूणं नगर
 जाव विणेजामित्तिकट्टु तंसि दोहलंसि अविणिज्जमाणंसि सुक्खा भुक्खा निम्मंसा उलुग्गा उलुग्गसरीरा नित्तेया दीणविमणवयणा पंडुल्लियमुही ओमंथियनयणवयणकमला जहो-
 इयं पुप्फवत्थगंधमल्लालंकारहारं अपरिभुंजमाणी करयलमलियद्व कमलमाला ओहय जाव झियाति इमं च णं भीमे कूडग्गाहे जेणेव उप्पला कूडग्गाहिणी तेणेव उवा० ता ओहय०
 जाव पासति ता एवं व०-किण्णं तुमं देवाणुप्पिया ओहय जाव झियासि?, तते णं सा उप्पला भारिया भीमं कूड० एवं व०-एवं खलु देवाणुप्पिया! ममं तिण्हं मासाणं बहुपडिपुण्णाणं
 दोहले पाउब्भूते-धण्णा णं० जाओ णं बहूणं गो० ऊहेहि य० लावणिएहि य० सुरं च० आसा० दोहलं विणेति तते णं अहं देवाणु० तंसि दोहलंसि अविणिज्जमाणंसि जाव झियामि,
 तते णं से भीमे कूड० उप्पलं भारियं एवं व०-मा णं तुमं देवाणु० ओहय जाव झियाहि अहं णं तहा करिहामि जहा णं तव दोहलस्स संपत्ती भविस्सइ ताहिं इट्ठाहिं जाव समासासेति,
 तते णं से भीमे कूड० अड्ढरत्तकालसमयंसि एगे अबीए सण्णद्व जाव पहरणे सयाओ गिहाओ निग्गच्छति ता हत्थिणाउरं मज्झंमज्झेणं० जेणेव गोमंडवे तेणेव उवागते ता बहूणं
 णगरगोरूवाणं जाव वसभाण य अप्पेगइयाणं ऊहे छिंदति जाव अप्पेगइयाणं कंबलए छिंदति अप्पेगइयाणं अण्णमण्णाइं अंगोवंगाइं वियंगेति ता जेणेव सए गिहे तेणेव उवागच्छति
 ता उप्पलाए कूडग्गाहिणीए उवणेति, तते णं सा उप्पला भारिया तेहिं बहूहिं गोमंसेहिं सोल्लेहिं जाव सुरं च० आसा० तं दोहलं विणेति, तते णं सा उप्पला कूडग्गाही संपुण्णदोहला
 संमाणियदोहला विणी(माणि)यदोहला वोच्छिण्णदोहला संप(पु)न्नदोहला तं गम्भं सुहंसुहेणं परिवहति, तते णं सा उप्पला कूड० अण्णया कयाती णवण्हं मासाणं बहुपडिपुण्णाणं दारगं प-
 याता।९। तते णं तेणं दारएणं जायमेत्तेणं चेव महया २ सहेणं विघुट्टे चिच्चीसरे आरसिते, तते णं तस्स दारगस्स आरसियसइ सोच्चा निसम्म हत्थिणाउरे णगरे बहवे नगरगोरूवा जाव वसभा
 य भीया उव्विग्गा सव्वओ समंता विप्पलाइत्था, तते णं तस्स दारगस्स अम्मापियरो अयमेयारूवं नामधेज्जं करेंति जम्हा णं अम्हे इमेणं दारएणं जायमेत्तेणं चेव महया २ सहेणं
 विघुट्टे चिच्चीसरे आरसिते तते णं एयस्स दारगस्स आरसितसइ सोच्चा निसम्म हत्थिणाउरे बहवे णगरगोरूवा य जाव भीया० सव्वतो समंता विप्पलाइत्था तम्हा णं होउ अम्हं दारए
 गोत्तासए नामेणं, तते णं से गोत्तासे दारए उम्मुक्कबालभावे जाव जाते यावि होत्था, तते णं से भीमे कूडग्गाहे अण्णया कयाती कालधम्मणा संजुत्ते तते णं से गोत्तासे दारए बहुणा
 मित्तणाइणियगसयणसंबंधिपरिजणेणं सद्धिं संपरिवुडे रोअमाणे कंदमाणे विलवमाणे भीमस्स कूडग्गाहस्स नीहरणं करेति ता बहूइं लोइयाइं मयकिच्चाइं करेति, तते णं से सुनंदे राया
 गोत्तासं दारयं अण्णया कयाती सयमेव कूडग्गाहिन्ताए ठवेति, तते णं से गोत्तासे दारए कूडग्गाहे जाए यावि होत्था अहम्मिए जाव दुप्पडियाणंदे, तते णं से गोत्तासे दारए कूडग्गाहे
 कल्लाकल्लिं अड्ढरत्तकालसमयंसि एगे अबीए सण्णद्वबद्धकवए जाव गहियाउहपहरणे सयातो गिहातो निज्जाति जेणेव गोमंडवे तेणेव उवा० बहूणं णगरगोरूवाणं सणा जाव वियं-
 गेति ता जेणेव सए गिहे तेणेव उवा०, तते णं से गोत्तासे कूड० तेहिं बहूहिं गोमंसेहि य सोल्लेहि य मज्झं च जाव सुरं च० आसा० विहरति, तते णं से गोत्तासे कूड० एयकम्मे० सुबहुं
 पावं कम्मं समज्जिणित्ता पंचवाससयाइं परमाउं पालयित्ता अट्टदुहट्टोवगते कालमासे कालं किच्चा दोच्चाए पुढवीए उक्कोसं तिसागरो० उववण्णे।१०। तते णं सा विजयमेत्तस्स सत्थ-
 वाहस्स सुभदा णामं भारिया जातनिंदुया यावि होत्था जाया जाया दारगा विनिहायमावज्जंति, तते णं से गोत्तासे कूड० दोच्चाओ पुढवीओ अणंतरं उव्वट्टित्ता इहेव वाणियग्गामे
 णगरे विजयमित्तस्स सत्थवाहस्स सुभदाए भारियाए कुच्छिसि पुत्तत्ताए उववण्णे, तते णं सा सुभदा सत्थवाही अण्णया कयाई नवण्हं मासाणं बहुपडिपुण्णाणं दारगं पयाया तते णं
 सा सुभदा सत्थवाही तं दारगं जातमेत्तयं चेव एगंते उक्कुरुडियाए उज्झावेति ता दोच्चं पि गेण्हावेति ता आणुपुव्वेणं सारक्खमाणी संगोवेमाणी संवड्ढेति, तते णं तस्स दारगस्स अ-
 म्मापियरो ठितिपडियं च चंदसूरदंसणं च जागरियं च महया इड्ढिदसक्कारसमुदएणं करेति, तते णं तस्स दारगस्स अम्मापितरो एक्कारसमे दिवसे निवत्ते संपत्ते बारसाहे अयमेयारूवं
 गोण्णं गुणनिप्फण्णं नामधेज्जं करेंति जम्हा णं अम्हं इमे दारए जायमेत्तए चेव एगंते उक्कुरुडियाए उज्झिते तम्हा णं होउ अम्हं दारए उज्झियए नामेणं, तते णं से उज्झियए दारए
 पंचधातीपरिग्गहीते तं०-खीरधातीए मज्जण० मंडण० कीलावण० अंकधातीए जहा दढपतिण्णे जाव निव्वाघाये गिरिकंदमल्लीणेव चंपयपायवे सुहंसुहेणं विहरति, तते णं से वि-
 जयमित्ते सत्थवाहे अन्नया कयाई गणिमं च धरिमं च मेज्जं च परिच्छेज्जं च चउव्विहं भंडगं गहाय लवणसमुहं पोयवहणेणं उवागते, तते णं से विजयमित्ते तत्थ लवणसमुहे पोत-
 विवत्तीए णिब्बुड्ढभंडसारे अत्ताणे असरणे कालधम्मणा संजुत्ते, तते णं तं विजयमित्तं सत्थवाहं जे जहा बहवे ईसरतलवरमाडंबितकोडुंबियइब्भसेट्टिसत्थवाहा लवणसमुहे पोयविव-

तीए विवत्तियं निब्बुड्डभंडसारं कालधम्मणा संजुत्तं सुणेति ते तहा हत्थिनिक्खेवं च बाहिरभंडसारं च गहाय एगंते अवक्कमंति, तते णं सा सुभदा सत्थवाही विजयमित्तं सत्थवाहं लवणसमुदे पोतविवत्तीए विवत्तियं निब्बुड्डभंडसारं कालधम्मणा संजुत्तं सुणेति ता महया पतिसोएणं अप्फुण्णा समाणी परसुनियत्ताविव चंपगलता धसत्ति धरणीतलंसि सव्वंगेहिं संनिवडिया, तते णं सा सुभदा सत्थवाही मुहुत्तंतरेणं आसत्था समाणी बहूहिं भित्त जाव परिवुडा रोयमाणी कंदमाणी विलवमाणी विजयमित्तस्स सत्थवाहस्स लोइयाइं मयकिच्चाइं करेति, तते णं सा सुभदा सत्थवाही अण्णया कयाती लवणसमुदोत्तरणं च लच्छिविणासं च सत्थविणासं च पोतविणासं च पतिमरणं च अणुचितेमाणी २ कालधम्मणा संजुत्ता । ११ । तते णं ते णगरगुत्तिया सुभदं सत्थ० कालगयं जाणित्ता उज्झियगं दारगं सातो गिहातो निच्छुभंति ता तं गिहं अण्णस्स दलयंति, तते णं से उज्झियते दारए सयातो गिहातो निच्छुडे समाणे वाणियगामे नगरे सिंघाडगजावपहेसु जूयखलएसु वेसियाघरएसु पाणागारेसु य सुहंसुहेणं परिवड्डइ, तते णं से उज्झियतए दारए अणोहट्टिए अणिवारिए सच्छंदमती सइरप्प-यारे मज्जप्पसंगी चोरजूयवेसदारप्पसंगी जाते यावि होत्था, तते णं से उज्झियते अण्णया कयाई कामज्झयाए गणियाए सद्धिं संपलगे जाते यावि होत्था कामज्झयाए गणियाए सद्धिं विउलाइं उरालाइं माणुस्सगाइं भोगभोगाइं भुंजमाणे विहरति, तते णं तस्स मित्तस्स रण्णो अण्णया कयाई सिरीए देवीए जोणिसूले पाउब्भूते यावि होत्था, नो संचाएति विजयमित्ते राया सिरीए देवीए सद्धिं उरालाइं माणुसगाइं भोगभोगाइं भुंजमाणे विहरित्तए तते णं से विजयमित्ते राया अण्णया कयाती उज्झिययं दारयं कामज्झयाए गणियाए गेहाओ निच्छु-भावेइ ता कामज्झयं गणियं अब्भितरियं ठावेति ता कामज्झयाए गणियाए सद्धिं उरालाइं जाव विहरति, तते णं से उज्झियए दारए कामज्झयाए गणियाए गिहातो निच्छुभिए समाणे कामज्झयाए गणियाए मुच्छिते गिद्धे गढिते अज्झोववण्णे अण्णत्थ कत्थई सुइं च रतिं च धितिं च अविंदमाणे तच्चित्ते तम्मणे तह्से तदज्झवसाणे तदट्ठोवउत्ते तयप्पियकरणे तब्भावणाभाविते कामज्झयाए गणियाए बहूणि अंतराणि य छिदाणि य विवराणि य पडिजागरमाणे २ विहरति, तए णं से उज्झियए दारए अण्णया कयाई कामज्झयाए गणियाए अंतरं लभेति कामज्झयाए गणियाए गिहं रहस्सियगं अणुप्पविसइ ता कामज्झयाए गणियाए सद्धिं उरालाइं माणुस्सगाइं भोगभोगाइं भुंजमाणे विहरति, इमं च णं मित्ते राया ण्हाते जाव पायच्छित्ते सव्वालंकारविभूसिते मणुस्सवग्गुरापरिक्खित्ते जेणेव कामज्झयाए गणियाए गिहे तेणेव उवागच्छति ता तत्थ णं उज्झिययं दारयं कामज्झयाए गणियाए सद्धिं उरा-लाइं भोगभोगाइं जाव विहरमाणं पासति ता आसुरुत्ते० तिवलियभिउडिं निडाले साहट्टु उज्झिययं दारयं पुरिसेहिं गेण्हावेति ता अट्टिमुट्टिजाणुकोप्परपहारसंभग्गमहितगतं करेति ता अवओडगबंधणं करेति ता एएणं विहाणेणं वज्झं आणावेति, एवं खलु गोतमा ! उज्झियए दारए पुरा पोराणाणं कम्माणं जाव पच्चणुभवमाणे विहरति । १२ । उज्झियए णं भंते ! दारए इओ कालमासे कालं किच्चा कहिं गच्छिहिति कहिं उववज्जिहिति ?, गोतमा ! उज्झियए दारए पणवीसं वासाइं परमाउं पालइत्ता अजेव तिभागावसेसे दिवसे सुलभिण्णे कए समाणे कालमासे कालं किच्चा इमीसे रयणप्पहाए पुढवीए णेरइयत्ताए उववज्जिहिति, से णं ततो अणंतरं उव्वट्टित्ता इहेव जंबुदीवे दीवे भारहे वासे वेयड्डगिरिपायमूले वानरकुलंसि वाणरत्ताए उववज्जिहिति, से णं तत्थ उम्मुक्कबालभावे तिरियभोएसु मुच्छिते गिद्धे गढिते अज्झोववण्णे जाते जाते वानरपेत्तए वहेहिति तं एयकम्म० कालमासे कालं किच्चा इहेव जंबुदीवे दीवे भारहे वासे इंदपुरे नयरे गणियाकुलंसि पुत्तत्ताए पच्चायाहिति, तते णं तं दारयं अम्मापितरो जायमेत्तकं वद्धेहिंति नपुंसगकम्मं सिक्खावेहिंति, तते णं तस्स दारगस्स अम्मापितरो णिवत्तबारसाहस्स इमं एयारूवं णामधेज्जं करेहिंति, तं०-होउ णं पियसेणे णामं णपुंसए, तते णं से पियसेणे णपुंसते उम्मुक्कबालभावे जोव्वणगमणुप्पत्ते विण्णायपरिणय-मेत्ते रूवेण य जोव्वणेण य लावण्णेण य उक्किट्टे उक्किट्टसरीरे भविस्सति, तते णं से पियसेणे णपुंसए इंदपुरे नगरे बहवे राईसरजावपभिइओ बहूहिं य विजापओगेहि य मंतचुण्णेहि य हियउड्डावणेहि य काउड्डावणेहि य निण्हवणेहि य पण्हवणेहि य वसीकरणेहि य आभिओगिएहि य अभिओगित्ता उरालाइं माणुस्सयाइं भोगभोगाइं भुंजमाणे विहरिस्सति, तते णं से पियसेणे णपुंसए एयकम्म० सुबहुं पावं कम्मं समज्जिणित्ता एक्कवीसं वाससयं परमाउं पालयित्ता कालमासे कालं किच्चा इमीसे रयणप्पहाए पुढवीए णेरइयत्ताए उववज्जिहिति, ततो सिरीसिवेसु सुंसुमारे संसारो तहेव जहा पढमे जाव पुढवी०, से णं तओ अणंतरं उव्वट्टित्ता इहेव जंबुदीवे दीवे भारहे वासे चंपाए नयरीए महिसत्ताए पच्चायाहिति, से णं तत्थ अण्णया कयाती गोट्टिल्लिएहिं जीवियाओ ववरोविए समाणे तत्थेव चंपाए नयरीए सेट्टिकुलंसि पुत्त(प्र० म)त्ताए पच्चायाहिति, से णं तत्थ उम्मुक्कबालभावे तहारूवाणं थेराणं अंतिते केवलं बोहिं० अणगारे० सोहम्म० कप्पे० जहा पढमे जाव अंतं करेहिति । निक्खेवो । १३ ॥ इति उज्झितकाध्ययनं २ ॥ तच्चस्स उक्खेवो, एवं खलु जंबू ! तेणं कालेणं० पुरिमताले णामं नगरे होत्था रिद्ध०, तस्स णं पुरिमतालस्स नगरस्स उत्तरपुरच्छिमे दिसीभाए एत्थ णं अमोहदंसी उज्जाणे, तत्थ णं अमोहदंसिस्स जक्खस्स जक्खाययणे होत्था, तत्थ णं पुरिमताले

महबले नामं राया होत्था, तस्स णं पुरिमतालस्स णगरस्स उत्तरपुरच्छिमे दिसीभाए देसपंते अडवी संठिया, एत्थ णं सालाडवी नामं चोरपल्ली होत्था विसमगिरिकंदरकोलंबसणि-
विट्ठा वंसीकलंकपागारपरिक्खत्ता छिण्णसेलविसमप्पवायफरिहोवगूढा अब्भितरपाणिया सुदुल्लभजलपेरंता अणेगखंडीविदितजणदिण्णनिग्गमप्पवेसा सुबहुयस्सवि कूवियस्स जणस्स
दुप्पहंसा यावि होत्था, तत्थ णं सालाडवीए चोरपल्लीए विजए नामं चोरसेणावती परिवसति अहम्मिए जाव विहरइ हणछिन्नभिन्नवियत्तए लोहियपाणी बहुणगरणिग्गतजसे सूरें दढप्प-
हारी साहसिते सहवेही असिलट्टिपढममल्ले, से णं तत्थ सालाडवीए चोरपल्लीए पंचण्हं चोरसताणं आहेवच्चं जाव विहरति । १४ । तते णं से विजए चोरसेणावती बहुणं चोराण य पारदा-
रियाण य गंठिभेयगाण य संधिछेयाण य खंडपट्टाण य अण्णेसिं च बहुणं छिण्णभिण्णबाहिराहियाणं कुडंगे यावि होत्था, तते णं से विजए चोरसेणावई पुरिमतालस्स णगरस्स उत्त-
रपुरच्छिमिल्लं जणवयं बहुहिं गामघातेहि य नगरघातेहि य गोग्गहणेहि य बंदिग्गहणेहि य पंथकोट्टेहि य खत्तखणणेहि य ओवीलेमाणे २ विदंसेमाणे तज्जेमाणे तालेमाणे नित्थाणे
निद्वणे निक्कणे कप्पायं करेमाणे विहरति, महबलस्स रण्णो अभिक्खणं २ कप्पायं गेण्हति, तस्स णं विजयस्स चोरसेणावइयस्स खंदसिरी नामं भारिया होत्था अहीण०, तस्स णं
विजयचोरसेणावइस्स पुत्ते खंदसिरीए भारियाए अत्तए अभग्गसेणे नामं दारए होत्था अहीण०, तेणं कालेणं० समणे भगवं महावीरे पुरिमतालनगरे समोसढे परिसा निग्गया राया
निग्गओ धम्मो कहिओ परिसा राया य पडिगओ, तेणं कालेणं० समणस्स भगवओ महावीरस्स जेट्ठे अंतेवासी गोयमे जाव रायमग्गं समोगाढे, तत्थ णं बहुवे हत्थी पासति बहुवे
आसे० पुरिसे सण्णद्वबद्धकवए, तेसिं णं पुरिसाणं मज्झगतं एगं पुरिसं पासति अवओडय० जाव उग्घोसेज्जमाणं, तते णं तं पुरिसं रायपुरिसा पढमंसि चच्चरंसि निसीयावेंति ता अट्ट चुल्ल-
पिउए अग्गओ घाएंति ता कसप्पहारेहिं तालेमाणा २ कलुणं काकणिमंसाइं खावेंति ता रुहिरपाणं च पाएंति, तदाणंतरं च णं दोच्चंसि चच्चरंसि अट्ट चुल्लमाउयाओ अग्गओ घाएंति
ता० एवं तच्चे चच्चरे अट्ट महापिउए चउत्थे अट्ट महामाउयाओ पंचमे पुत्ते छट्ठे सुण्हाओ सत्तमे जामाउया अट्टमे धूयाओ णवमे णत्तुया दसमे णत्तुईओ एकारसमे णत्तुयावई
बारसमे णत्तुइणीओ तेरसमे पिउस्सियपतिया चोदसमे पिउस्सियाओ पण्णरसमे माउसियापतिया सोलसमे माउस्सियाओ सत्तरसमे मामियाओ अट्टारसमे अवसेसं मित्तनाइनि-
यगसयणसंबंधिपरियणं अग्गओ घातेंति ता कसप्पहारेहिं तालेमाणा २ कलुणं काकणिमंसाइं खावेंति रुहिरपाणं च पाएंति । १५ । तते णं से भगवं गोतमे तं पुरिसं पासति ता इमे
एयारूवे अज्झत्थिए० समुप्पण्णे जाव तहेव णिग्गते एवं व०-एवं खलु अहं भंते ! तं चेव जाव से णं भंते ! पुरिसे पुब्रभवे के आसी जाव विहरति, एवं खलु गोतमा ! तेणं कालेणं०
इहेव जंबुदीवे दीवे भारहे वासे पुरिमताले नामं नगरे होत्था रिद्ध०, तत्थ णं पुरिमताले नगरे उदिओदए नामं राया होत्था महया०, तत्थ णं पुरिमताले निन्नए नामं अंडयवाणियए
होत्था अड्ढे जाव अपरिभूते अहम्मिए जाव दुप्पडियाणंदे, तस्स णं णिण्णयस्स अंडयवाणियगस्स बहुवे पुरिसा दिण्णभतिभत्तवेयणा कल्लाकल्लिं कोदालियाओ य पत्थियापिडए य
गेण्हंति, पुरिमतालस्स णगरस्स परिपेरंतेसु बहुवे काइअंडए य घूतिअंडए य पारेवइ० टिट्ठिभिबगिमयूरिकुक्कुडिअंडए य अण्णेसिं च बहुणं जलयरथलयरखहयरमाईणं अंडाइं गेण्हंति
ता पत्थियपिडगाइं भरेंति ता जेणेव निन्नए अंडवाणियए तेणेव उवा० ता निन्नयस्स अंडवाणियगस्स उवणेंति, तते णं तस्स निन्नयस्स अंडवाणियगस्स बहुवे पुरिसा दिण्णभइ० बहुवे
काइअंडए य जाव कुक्कुडिअंडए य अण्णेसिं च बहुणं जलयरथलयरखहयरमाईणं अंडए तवएसु य कवल्लीसु य कंदूसु य भज्जणएसु य इंगालेसु य तलेंति भज्जेति सोल्लिति ता राय-
मग्गे अंतरावणंसि अंडयपणिएणं वित्तिं कप्पेमाणा विहरंति अप्पणावि य णं से निन्नयए अंडवाणियए तेहिं बहुहिं काइअंडएहि य जाव कुक्कुडिअंडएहि य सोल्लेहि य तलिएहि य
भज्जिएहि य सुरं च० आसाएमाणे० विहरति, तते णं से निन्नए अंडवाणियए एयकम्म० सुबहुं पावं कम्मं समज्जिणित्ता एगं वाससहस्सं परमाउं पालइत्ता कालमासे कालं किच्चा
तच्चाए पुढवीए उक्कोससत्तसागरोवमट्ठितीएसु णेरइएसु णेरइयत्ताए उववण्णे । १६ । से णं तओ अणंतरं उव्वट्ठित्ता इहेव सालाडवीए चोरपल्लीए विजयस्स चोरसेणावइस्स खंदसिरीए
भारियाए कुच्छिसि पुत्त(प्र० म)त्ताए उववण्णे, तते णं तीसे खंदसिरीए भारियाए अण्णया कयाई तिण्हं मासाणं बहुपडिपुण्णाणं इमे एयारूवे दोहले पाउब्भूते धण्णाओ णं ताओ
अम्मयाओ० जाओ णं बहुहिं मित्तणाइनियगसयणसंबंधिपरियणमहिलाहिं अण्णाहि य चोरमहिलाहिं सद्धिं संपरिवुडा ण्हाया जाव पायच्छित्ता सद्दालंकारविभूसिता विउलं असणं
पाणं खाइमं साइमं सुरं च० आसादेमाणा० विहरंति, जिमियभुत्तुत्तरागयाओ पुरिसनेवत्थिया सण्णद्व जाव पहरणावरणा भरिएहिं फलएहिं णिक्किट्ठाहिं असीहिं अंसागतेहिं तोणेहिं
सजीवेहिं धणूहिं समुक्खित्तेहिं सरेहिं समुल्लासियाहि य दामाहिं लंबियाहि य ऊरुघंटाहिं छिप्पतूरेणं वज्जमाणेणं महया उक्किट्ठ जाव समुहरवभूयंपिव करेमाणीओ सालाडवीए चोर-
पल्लीए सव्वओ समंता ओलोएमाणीओ २ आहिंडेमाणीओ २ दोहलं विणेंति तं जइ णं अहंपि जाव विणिज्जामित्तिकट्ठु तंसि दोहलंसि अविणिज्जमाणंसि जाव झियाति, तते णं से

विजए चोरसेणावती खंदसिरिभारियं ओहत जाव पासति ता एवं व०-किण्णं तुमं देवाणु०! ओहत जाव झियासि?, तते णं सा खंदसिरी विजयं एवं व०-एवं खलु देवाणु०! मम तिण्हं मासाणं जाव झियामि, तते णं से विजए चोरसेणावती खंदसिरीभारियाए अंतिते एयमट्ठं सोच्चा निसम्म० खंदसिरिभारियं एवं व०-अहासुहं देवाणुप्पिएत्ति एयमट्ठं पडिसु-
 नेति, तते णं सा खंदसिरीभारिया विजएणं चोरसेणावतिणा अब्भणुण्णाया समानी हट्ठ० बहूहिं मित्त जाव अण्णाहि य बहूहिं चोरमहिलाहिं सद्धिं संपरिवुडा ण्हाया जाव विभूसिता विपुलं असणं० सुरं च० आसादेमाणी० विहरति, जिमियभुत्तुत्तरागया पुरिसणेवत्थिया सण्णदबद्ध जाव आहिंडमाणी डोहलं विणेति, तते णं सा खंदसिरिभारिया संपुण्णदोहला संमा-
 णियदोहला विणी(माणि)यदोहला वोच्छिण्णदोहला संपन्नदोहला तं गम्भं सुहंसुहेणं परिवहति, तते णं सा खंदसिरी चोरसेणावतिणी णवण्हं मासाणं बहुपडिपुण्णाणं दारगं पयाता, तते णं से विजए चोरसेणावती तस्स दारगस्स महया इडिढसक्कारसमुदएणं दसरत्तं ठिइवडियं करेति, तते णं से विजए चोरसेणावती तस्स दारगस्स एक्कारसमे दिवसे विपुलं असणं० उवक्खडा-
 वेति मित्तनाति० आमंतेति ता जाव तस्सेव मित्तनाति० पुरओ एवं व०-जम्हा णं अम्हं इमंसि दारगंसि गम्भगयंसि समानंसि इमे एयारूवे दोहले पाउब्भूते तम्हा णं होउ अम्हं दारए अभग्गसेणे णामेणं, तते णं से अभग्गसेणे कुमारे पंचधाई जाव परिवड्ढति । १७। तते णं से अभग्गसेणकुमारे उम्मुक्कबालभावे यावि होत्था, अट्ट दारियाओ जाव अट्टओ दाओ उप्पि पासाए भुंजमाणे विहरति, तते णं से विजए चोरसेणावती अण्णया कयाती कालधम्मणा संजुत्ते, तते णं से अभग्गसेणे कुमारे पंचहिं चोरसतेहिं सद्धिं संपरिवुडे रोयमाणे कंदमाणे विलवमाणे विजयस्स चोरसेणावइस्स महया इडिढसक्कारसमुदएणं णीहरणं करेति ता बहूइं लोइयाइं मयकिच्चाइं करेति ता केवइकालेणं अप्पसोए जाते यावि होत्था, तते णं ताइं पंच चोरसयाइं अन्नया कयाती अभग्गसेणं कुमारं सालाडवीए चोरपल्लीए महया० चोरसेणावइत्ताए अभिसिंचंति, तते णं से अभग्गसेणे कुमारे चोरसेणावती जाते अहम्मिए जाव कप्पायं गेण्हति, तते णं ते जाणवया पुरिसा अभग्गसेणेणं चोरसेणावतिणा बहुगामघायावणाहिं० ताविया समाना अण्णमण्णं सदावेति ता एवं व०-एवं खलु देवाणु०! अभग्गसेणे चोरसेणावती पुरिमतालस्स णगरस्स उत्तरिहं जणवयं बहूहिं गामघातेहिं जाव निद्धणं करेमाणे विहरति, तं सेयं खलु देवाणुप्पिया! पुरिमताले णगरे महब्बलस्स रण्णो एतमट्ठं विन्न-
 वित्तते (प्र० निवेदित्तए) तते णं ते जाणवयपुरिसा एतमट्ठं अण्णमण्णं पडिसुणेंति ता महत्थं महग्गं महरिहं रायरिहं पाहुडं गेण्हति ता जेणेव पुरिमताले णगरे जेणेव महब्बले राया तेणेव उवागते ता महब्बलस्स रण्णो तं महत्थं जाव पाहुडं उवणेंति ता करयल० अंजलिं कट्टु महब्बलं रायं एवं व०-एवं खलु सामी! सालाडवीए चोरपल्लीए अभग्गसेणे चोरसेणावती अम्हे बहूहिं गामघातेहि य जाव निद्धणे करेमाणे विहरति तं इच्छामि णं सामी! तुभं बाहुच्छायापरिग्गहीया निब्भया णिरुद्धिग्गा सुहंसुहेणं परिवसित्तएत्तिकट्टु पादपडिया पंजलिउडा महब्बलं रायं एतमट्ठं विण्णवेंति, तते णं से महब्बले राया तेसिं जाणवयाणं पुरिसाणं अंतिए एयमट्ठं सोच्चा निसम्म आसुरुत्ते जाव मिसिमिसेमाणे तिवलियं भिउडिं निडाले साहट्टु दंडं सदावेति ता एवं व०-गच्छह णं तुमं देवाणुप्पिया! सालाडविं चोरपल्लिं विलुंपाहि ता अभग्गसेणं चोरसेणावइं जीवग्गाहं गेण्हहि ता मम उवणेहि, तते णं से दंडे तहत्ति विणएणं एयमट्ठं पडिसुणेति, तते णं से दंडे बहूहिं पुरिसेहिं सण्णद जाव पहरणेहिं सद्धिं संपरिवुडे मग्गइएहिं फलएहिं जाव छिप्पतूरेणं वज्जमाणेणं महया २ जाव करेमाणे पुरिमतालं णगरं मज्झंमज्झेणं निग्गच्छति ता जेणेव सालाडवी चोरपल्ली तेणेव पहारेत्थ गमणाए, तते णं तस्स अभग्गसेणस्स चोरसेणावइस्स चारपुरिसा इमीसे कहाए लद्धट्ठा समाना जेणेव सालाडवी चोरपल्ली जेणेव अभग्गसेणे चोरसेणावइं तेणेव उवागच्छंति करयल जाव एवं व०-एवं खलु देवाणुप्पिया! पुरिमताले णगरे महब्बलेणं रण्णा महया भड-
 चडगरेणं दंडे आणत्ते-गच्छह णं तुमे देवाणु०! सालाडविं चोरपल्लिं विलुंपाहि ता अभग्गसेणं चोरसेणावतिं जीवग्गाहं गेण्हहि ता मम उवणेहि, तते णं से दंडे महया भडचडगरेणं जेणेव चोरपल्ली तेणेव पहारेत्थ गमणाए, तते णं से अभग्गसेणे तेसिं चारपुरिसाणं अंतिए एयमट्ठं सोच्चा निसम्म पंचचोरसताइं सदावेति ता एवं व०-एवं खलु देवाणुप्पिया! पुरिमताले णगरे महब्बले जाव तेणेव पहारेत्थ गमणाए आगते, तते णं से अभग्गसेणे ताइं पंचचोरसताइं एवं व०-तं सेयं खलु देवाणुप्पिया! अम्हं तं दंडं सालाडविं चोरपल्लिं असंपत्तं अंतरा चेव पडिसे-
 हित्तए, तते णं ताइं पंचचोरसताइं अभग्गसेणस्स चोरसेणावइस्स तहत्ति जाव पडिसुणेंति, तते णं से अभग्गसेणे चोरसेणावती विपुलं असणं पाणं खाइमं साइमं उवक्खडावेति ता पंचहिं चोरसतेहिं सद्धिं ण्हाते जाव पायच्छित्ते भोयणमंडवंसि तं विपुलं असणं० सुरं च० आसाएमाणे० विहरति, जिमियभुत्तुत्तरागतेवि य णं समाणे आयंते चोक्खे परमसुईभूते पंचहिं चोरसतेहिं सद्धिं अल्लं चम्मं दुरूहति ता सण्णद० जाव पहरणेहिं मग्गाइतेहिं जाव रवेणं पुट्ठा (प्र० पच्चा)वरण्हकालसमयंसि सालाडवीओ चोरपल्लीओ णिग्गच्छति ता विसमदुग्गगहणं ठिते गहियभत्तपाणिए तं दंडं पडिवालेमाणे चिट्ठति, तते णं से दंडे जेणेव अभग्गसेणे चोरसेणावती तेणेव उवागच्छति ता अभग्गसेणेणं चोरसेणावइणा सद्धिं संपलग्गे यावि होत्था, तते णं से अभग्गसेणे चोरसेणावइं तं दंडं खिप्पामेव हयमहिय जाव पडिसेहेति, तते णं से दंडे अभग्ग० चोरसे० हय० जाव पडिसेहिते समाणे अथामे अबले अवीरिए अपु- (१३६)

रिसकारपरकमे आधारणिजमिति कट्टु जेणेव पुरिमताले नगरे जेणेव महबले राया तेणेव उवा० ता करयल० जाव एवं व०-एवं खलु सामी ! अभग्गसेणे चोरसे० विसमदुग्गगहणं ठिते गहितभत्तपाणि ए नो खलु से सका केणइ सुबहुएणावि आसबलेण वा हत्थिबलेण वा जोहबलेण वा रहबलेण वा चाउरंगेणपि उरंउरेणं गेण्हितते ताहे सामेण य भेदेण य उवप्पदाणेण य वीसंभमाणेउं पयत्ते यावि होत्था, जेविय से अब्भितरगासीसगभमा भित्तनातिनि-यगसयणसंबंधिपरियणं च विपुलधणकणगरयणसंतसारसावतेजेणं भिंदति, अभग्गसेणस्स य चोरसे० अभिक्खणं २ महत्थाइं महग्घाइं महरिहाइं रायारिहाइं पाहुडाइं पेसेति अभग्गसेणं च चोरसे० वीसंभमाणेइ । १८ । तते णं से महबले राया अण्णया कयाइं पुरिमताले नगरे एगं महं महतिमहालयं कूडागारसालं करेति अणेगखंभसतसंनिविट्ठं पासाईयं०, तते णं से महबले राया अण्णया कयाइं पुरिमताले नगरे उस्सुकं जाव दसरत्तं पमोयं उग्घोसावेति ता कोडुंबियपुरिसे सदावेति ता एवं व०-गच्छह णं तुब्भे देवाणु० ! सालाडवीए चोरपल्लीए तत्थ णं तुब्भे अभग्गसेणं चोरसे० करयल जाव एवं व०-एवं खलु देवा० ! पुरिमताले नगरे महबलस्स रण्णो उस्सुकं जाव दसरत्ते पमोदे उग्घोसिते तं किण्णं देवाणु० ! विउलं असणं० पुप्फवत्थगंधमल्लालंकारे य इहं हव्वमाणिज्ज उ उयाहु सयमेव गच्छित्था ? , तते णं कोडुंबियपुरिसे महबलस्स रण्णो कर० जाव पुरिमतालाओ नगराओ पडि० ता णानिविकिट्ठेहिं अद्धानेहिं सुहेहिं वसहिपायरासेहिं जेणेव सालाडवी चोरपल्ली तेणेव उवा० अभग्गसेणं चोरसेणावतिं करयल० जाव एवं व०-एवं खलु देवाणु० ! पुरिमताले नगरे महबलस्स रण्णो उस्सुकं जाव उदाहु सयमेव गच्छित्था ? , तते णं से अभग्ग० चोरसे० ते कोडुंबियपुरिसे एवं व०-अहण्णं देवाणु० ! पुरिमतालं नगरं सयमेव गच्छामि, ते कोडुंबियपुरिसे सकारेति० पडिविसज्जेति, तते णं से अभग्गसेणे चोरसे० बहूहिं मित्त० जाव परिवुडे ण्हाते जाव पायच्छित्ते सव्वालंकारविभूसिते सालाडवीओ चोरपल्लीओ पडिनिक्खमति ता जेणेव पुरिमताले नगरे जेणेव महबले राया तेणेव उवा० ता करयल० महबलं रायं जएणं विजएणं वद्धावेति ता महत्थं जाव पाहुडं उवणेति, तते णं से महबले राया अभग्गसेणस्स चोरसे० तं महत्थं जाव पडिच्छति अभग्गसेणं चोर० सकारेति संमाणेति ता पडिविसज्जेति कूडागारसालं च से आवसहं दलयति, तते णं से अभग्गसेणे चोरसेणावती महबलेणं रण्णा विसज्जिते समाणे जेणेव कूडागारसाला तेणेव उवागच्छति, तते णं से महबले राया कोडुंबियपुरिसे सदावेति ता एवं व०-गच्छह णं तुब्भे देवाणु० ! विउलं असणं० उवक्खडावेह ता तं विउलं असणं० सुरं च० सुबहुं पुप्फवत्थगंधमल्लालंकारं च अभग्ग-सेणस्स चोरसे० कूडागारसालाए उवणेह, तते णं ते कोडुंबियपुरिसे करयल० जाव उवणेंति, तते णं से अभग्गसेणे चोरसेणावई बहूहिं मित्त० सद्धिं संपरिवुडे ण्हाते जाव सव्वालंकारविभूसिए तं विउलं असणं० सुरं च० आसाए० पमत्ते विहरति, तते णं से महबले राया कोडुंबियपुरिसे सदावेति ता एवं व०-गच्छह णं तुब्भे देवाणु० पुरिमतालस्स नगरस्स दुवाराइं पिहेति अभग्गसेणं चोरसे० जीवग्गाहं गेण्हति महबलस्स रण्णो उवणेंति, तते णं से महबले राया अभग्गसेणं चोरसे० एतेणं विहाणेणं वज्झं आणवेति, एवं खलु गोतमा ! अभग्गसेणे चोरसेणावती पुरा जाव विहरति, अभग्गसेणे णं भंते ! चोरसेणावती कालमासे कालं किच्चा कहिं गच्छिहिइ कहिं उववज्जिहिति ? , गोतमा ! अभग्गसेणे चोरसे० सत्ततीसं वासाइं परमाउयं पालइत्ता अज्जेव तिभागावसेसे दिवसे सुलभिण्णे कते समाणे कालगते इमीसे रयणप्पभाए पुढवीए उक्कोस० नेरइएसु उववज्जिहिति, से णं ततो अणंतरं उव्वट्ठित्ता एवं संसारो जहा पढमे जाव पुढवीए ततो उव्वट्ठित्ता वाणारसीए नगरीए सूयरत्ताए पच्चायाहिति से णं तत्थ सोयरिएहिं जीवियाउ ववरोविए समाणे तत्थेव वाणारसीए नगरीए सेट्टिकुलंसि पुत्त(प्र० म)त्ताए पच्चायाहिति, से णं तत्थ उम्मुक्कबालभावे एवं जहा पढमे जाव अंतं काहिति । निक्खेवो । १९ ॥ इति अभ-ग्गसेणज्झयणं ३ ॥ जति णं भंते !० चउत्थस्स उक्खेवो, एवं खलु जम्बू ! तेणं कालेणं० साहंजणी नामं नगरी होत्था रिद्धत्थिमिय०, तीसे णं साहंजणीए बहिया उत्तरपुरच्छिमे दिसीभाए देवरमणे नामं उज्जाणे होत्था, तत्थ णं अमोहस्स जक्खस्स जक्खायतणे होत्था पुराणे०, तत्थ णं साहंजणीए नयरीए महचंदे नामं राया होत्था महता०, तस्स णं महचंदस्स रण्णो सुसेणे नामं अमच्चे होत्था सामदामभेयदंडनिग्गहकुसले, तत्थ णं साहंजणीए नगरीए सुदरिसणा नामं गणिया होत्था वण्णओ, तत्थ णं साहंजणीए नयरीए सुभदे नामं सत्थवाहे परिवसइ अड्ढे०, तस्स णं सुभदस्स सत्थवाहस्स भद्दा नामं भारिया होत्था अहीण०, तस्स णं सुभदस्स सत्थवाहस्स पुत्ते भद्दाए भारियाए अत्ताए सगडे नामं दारए होत्था अहीण०, तेणं कालेणं० समणे भगवं महावीरे समोसडे परिसा राया य निग्गते धम्मो कहिओ परिसा पडिगया, तेणं कालेणं० समणस्स० जेट्ठे अंतेवामी जाव रायमग्गं ओगाढे, तत्थ णं हत्थी आसे पुरिसे० तेसिं च णं पुरिसाणं मज्झगतं पासति एगं सइत्थियं पुरिसं अवओडगबंधणं उक्कित्तकण्णनासं जाव उग्घोसणं चिंता तहेव जाव भगवं वागरेति-एवं खलु गोतमा ! तेणं कालेणं० इहेव जंबुदीवे दीवे भारहे वासे छगलपुरे नामं नगरे होत्था, तत्थ सीहगिरी नामं राया होत्था महया०, तत्थ णं छगलपुरे नगरे छणिणए नामं छागलिए परिवसति अड्ढे अहम्मिए जाव दुप्पडियाणंदे, तस्स णं छणिणयस्स छागलियस्स बहवे अयाण य एत्थयाण य रोज्झाण य वसभाण य ससयाण य पसयाण य सूयराण य सिंघाण य हरिणाण य मऊराण य महिसाण य सतबद्धाण य सहस्सबद्धाण य जूहाणि वाडगंसि सण्णिरुद्धाइं चिट्ठेति, अण्णे य तत्थ बहवे पुरिसा दिण्णभइभत्त० बहवे अए य जाव महिसे य सारक्खेमाणा संगोवेमाणा चिट्ठेति, अण्णे य से बहवे पुरिसा दिण्णभति० बहवे अए य जाव महिसे य सयए य सहस्सए य जीवियाओ ववरोविंति ता मंसाइं कप्पणीकप्पियाइं करेति छणिणयस्स छाग-लियस्स उवणेंति, अण्णे य से बहवे पुरिसा ताइं बहुयाइं अयमंसाइं जाव महिसमंसाइं तवएसु य कवल्लीसु य कंदूएसु य भज्जणएसु इंगालेसु य तलेंति य भज्जेति य सोल्लिति य ता य रायमग्गंसि वित्तिं कप्पेमाणा विहरंति, अप्पणावि य णं से छणिणयए छागलिए तेहिं बहूहिं अयमंसेहि य जाव महिसमंसेहि य सोल्लेहि य तल्लिएहि य भज्जिएहि य सुरं च० आसादेमाणे० विहरति, तते णं से छणिणए छागलिए एयकम्म० सुबहुं पावकम्मं कलिकलुसं समज्जिणित्ता सत्तवाससयाइं परमाउं पालइत्ता कालमासे कालं किच्चा चउत्थीए पुढवीए उक्कोसेणं दससागरोवमठितीएसु नेरइएसु नेरइयत्ताए उववण्णे । २० । तते णं सा तस्स सुभदस्स सत्थवाहस्स भद्दा भारिया जाव णिंदुया

यावि होत्था जाता २ दारगा विणिहायमावजंति, तते णं से छणिणए छागलिए चउत्थीए पुढवीए अणंतरं उव्वट्ठिता इहेव साहंजणीए णयरीए सुभदस्स सत्थवाहस्स भददाए भारियाए कुच्छिसि पुत्ताए उववण्णे, तते णं सा भद्दा सत्थवाही अण्णया कयाई णवण्हं मासाणं बहुपडिपुण्णाणं दारगं पयाया, तते णं तं दारगं अम्मापियरो जायमेत्तं चैव सगडस्स हेट्ठओ ठवेति ता दोच्चपि गेण्हावेति अणुपुव्वेणं सारक्खंति संगोवेति संवड्ढेति जहा उज्झियए जाव जम्हा णं अम्हं इमे दारए जायमेत्तए चैव सगडस्स हेट्ठओ ठवेति तम्हा णं होउ णं अम्हं एस दारए सगडे नामेणं सेसं जहा उज्झियए, सुभदे लवणे कालगओ मायावि कालगता सेवि गिहाओ निच्छूढे, तते णं से सगडे दारए साओ गिहाओ निच्छूढे समाने सिंघाडग० तहेव जाव सुदरिसणाए गणियाए सद्धिं संपलग्गे यावि होत्था, तते णं से सुसेणे अमच्चे तं सगडं दारयं अण्णया कयाई सुदरिसणाए गणियाए गिहाओ निच्छूभावेति ता सुदंसणियं गणियं अब्भितरयं ठावेति ता सुदरिसणाए गणियाए सद्धिं उरालाई माणुस्सगाई भोगभोगाई भुंजमाणे विहरति, तते णं से सगडे दारए सुदरिसणाए गिहाओ निच्छूढे समाने अण्णत्थ कत्थवि सतिं वा० अलभमाणे अण्णया कयाई रहस्सियं सुदरिसणागिहं अणुपविसति ता सुदरिसणाए सद्धिं उरालाई भोगभोगाई भुंजमाणे विहरति, इमं च णं सुसेणे अमच्चे ण्हाते जाव विभूसिते मणुस्सवग्गुराए परिक्खित्ते जेणेव सुदरिसणागणियाए गिहे तेणेव उवा० ता सगडं दारयं सुदरिसणाए गणियाए सद्धिं उरालाई भोगभोगाई भुंजमाणं पासति ता आसुरुत्ते जाव मिसिमिसेमाणे तिवलियं भिउडिं णिलाडे साहट्ठु सगडं दारयं पुरिसेहिं गेण्हावेति ता अट्ठि जाव महियं करेति ता अय-ओडगबंधणं करेति ता जेणेव महचंदे राया तेणेव उवा० करयल० जाव एवं व०-एवं खलु सामी ! सगडे दारए ममं अंतेपुरंसि अवरद्धे, तते णं महचंदे राया सुसेणं अमच्चं एवं व०-तुमं चैव णं देवाणु० ! सगडस्स दारगस्स दंडं णिव्वत्तेहि, तए णं से सुसेणे अमच्चे महचंदेणं रण्णा अब्भणुण्णाए समाने सगडं दारयं सुदरिसणं च गणियं एएणं विहाणेणं वज्झं आणावेति, तं एवं खलु गोतमा ! सगडे दारए पुरा पोराणाणं दुच्चिण्णाणं जाव विहरति । २१ । सगडे णं भंते ! दारए कालगते कहिं गच्छिहिति कहिं उव्वज्जिहिति ?, गोतमा ! सगडे णं दारए सत्तावण्णं वासाई परमाउं पालयित्ता अज्जेव तिभागावसेसे दिवसे एगं महं अओमयं तत्तसमजोइभूयं इत्थिपडिमं अवयासाविए समाने कालमासे कालं किच्चा इमीसे रयणप्पभाए पुढवीए णेरइयत्ताए उव्वज्जिहिति से णं ततो अणंतरं उव्वट्ठिता रायगिहे णगरे मातंगकुलंसि जमलत्ताए पच्चायाहिति, तते णं तस्स दारगस्स अम्मापियरो णिव्वत्तबारसाहस्स इमं एयारूवं गोण्णं णामधेज्जं करिस्संति तं०-होउ णं दारए सगडे णामेणं होउ णं दारिया सुदरिसणा णामेणं, तते णं से सगडे दारए उम्मुक्कबालभावे जोव्वण० भविस्सति, तए णं सा सुदरिसणावि दारिया उम्मुक्कबालभावा विण्णाय० जोव्वणगमणुप्पत्ता रूवेण य जोव्वणेण य लावण्णेण य उक्किट्ठा उक्किट्ठसरीरा यावि भविस्सति, तए णं से सगडे दारए सुदरिसणाए रूवेण य जोव्वणेण य लावण्णेण य मुच्छिते० सुदरिसणाए भइणीए सद्धिं उरालाई माणुस्सगाई भोगभोगाई भुंजमाणे विहरिस्सति, तते णं से सगडे दारए अण्णया कयाई सयमेव कूडग्गाहत्तं उवसंपज्जित्ताणं विहरिस्सति, तते णं से सगडे दारए कूडग्गाहे भविस्सति अहम्मिए जाव दुप्पडियाणंदे एयकम्मे सुबहुं पावं जाव समज्जिणित्ता कालमासे कालं किच्चा इमीसे रयणप्पभाए पुढवीए णेरइयत्ताए उववण्णे संसारो तहेव जाव पुढवी, से णं ततो अणंतरं उव्वट्ठिता वाणारसीए णयरीए मच्छत्ताए उव्वज्जिहिति, से णं तत्थ मच्छिएहिं वधिए तत्थेव वाणारसीए णयरीए सेट्टिकुलंसि पुत्ताए पच्चायाहिति बोही पव्वज्जा सोहम्मे महाविदेहे सिज्झिहिति०, निक्खेवो । २२ ॥ इति शकटाध्ययनं ४ ॥ जति णं भंते ! पंचमस्स अज्झयणस्स० उक्खेवो, एवं खलु जम्बू ! तेणं कालेणं० कोसंबी णामं णगरी होत्था रिद्ध०, बाहिं चंदोतरणे उज्जाणे सेयभदे जक्खे, तत्थ णं कोसंबीए णगरीए सयाणीए णामं राया होत्था महया०, मियावती देवी, तस्स णं सयाणीयस्स पुत्ते मियावतीए अत्ताए उदायणे णामं कुमारे होत्था अहीण० जुवराया, तस्स णं उदायणस्स कुमारस्स पउमावती णामं देवी होत्था, तस्स णं सयाणीयस्स सोमदत्ते नामं पुरोहिए होत्था रिउव्वेद०, तस्स णं सोमदत्तस्स पुरोहियस्स वसुदत्ता णामं भारिया होत्था, तस्स णं सोमदत्तस्स पुत्ते वसुदत्ताए अत्ताए बहस्सतिदत्ते नामं दारए होत्था अहीण०, तेणं कालेणं० समणे भगवं महावीरे समोसरणं, तेणं कालेणं० भगवं गोतमे तहेव जाव रायमग्गं ओगाढे तहेव पासति हत्थी आसे पुरिसे मज्झे पुरिसं चिंता तहेव पुच्छति पुव्वभवं भगवं वागरेति-एवं खलु गोतमा ! तेणं कालेणं० इहेव जंबुदीवे दीवे भारहे वासे सब्बओभदे णामं णगरे होत्था रिद्ध०, तत्थ णं सब्बतोभदे णगरे जितसत्तू णामं राया होत्था, तस्स णं जितसत्तुस्स रण्णो महेसरदत्ते नामं पुरोहिए होत्था रिउव्वेद० जाव अथव्वणकुसले यावि होत्था, तते णं से महेसरदत्ते पुरोहिते जितसत्तुस्स रण्णो रज्जबलविवद्वणट्ठयाए कल्लाकल्लिं एगमेगं माहणदारगं एगमेगं खत्तियदारगं एगमेगं वइस्सदारगं एगमेगं सुददारगं गेण्हावेति ता तेसिं जीवंतगाणं चैव हिययउंडए गेण्हावेति ता जितसत्तुस्स रण्णो संतिहोमं करेति, तते णं से महेसरदत्ते पुरोहिते अट्ठमिचउडसीसु दुवे माहणखत्तियवेस्ससुददारगे चउण्हं मासाणं चत्तारि २ छण्हं मासाणं अट्ठ २ संवच्छरस्स सोलस २ जाहे जाहेविय णं जितसत्तू राया परबलेणं अभिजुज्झति ताहे ताहेविय णं से महेसरदत्ते पुरोहिए अट्ठसयं माहणदारगाणं अट्ठसयं खत्तियदारगाणं अट्ठसयं वइस्सदारगाणं अट्ठसयं सुददारगाणं पुरिसेहिं गिण्हावेति ता तेसिं जीवंतगाणं चैव हिय-उंडए गेण्हावेति ता जितसत्तुस्स रण्णो संतिहोमं करेति, तते णं से परबलं खिप्पामेव विद्धंसेति वा पडिसेहिज्जति वा । २३ । तते णं से महेसरदत्ते पुरोहिते एयकम्मे० सुबहुं पावं जाव समज्जिणित्ता तीसं वाससयाई परमाउं पाल-यित्ता कालमासे कालं किच्चा पंचमाए पुढवीए उक्कोसेणं सत्तरससागरोवमट्ठितिए नरगे उववण्णे, से णं ततो अणंतरं उव्वट्ठिता इहेव कोसंबीए णयरीए सोमदत्तस्स पुरोहितस्स वसुदत्ताए भारियाए पुत्ताए उववण्णे, तते णं तस्स दारगस्स अम्मापितरो निव्वत्तबारसाहस्स इमं एयारूवं नामधिज्जं करेति जम्हा णं अम्हं इमे दारए सोमदत्तस्स पुरोहियस्स पुत्ते वसुदत्ताए अत्ताए तम्हा णं होउ अम्हं दारए बहस्सतिदत्ते नामेणं, तते णं से बहस्सतिदत्ते दारए पंचधातीपरिगहीते जाव परिवड्ढति, तते णं से बहस्सतिदत्ते उम्मुक्कबालभावे जोव्वण० विण्णाय० होत्था, से णं उदायणस्स कुमारस्स पियबालवयंसे यावि होत्था सहजायए सहवड्ढियए सहपंसुकीलियए, तते णं से सयाणीए राया अण्णया कयाई कालधम्मणा संजुत्ते, तते णं से उदायणे कुमारे बहूहिं राईसरजावसत्थवाहप्पभितीहिं सद्धिं संपरिवुडे रोयमाणे कंदमाणे विलवमाणे सयाणीयस्स रण्णो महया इड्ढिसक्कारसमुदएणं णीहरणं करेति ता बहूइं लोइ-

याइं मयकिच्चाइं करेति, तते णं ते बहवे राईसरजावसत्थवाहा उदायणं कुमारं महया रायाभिसेगेणं अभिसिंचंति, तते णं से उदायणे कुमारं राया जाते महया०, तते णं से बहस्सतिदत्ते दारए उदायणस्स रण्णो पुरोहियकम्मं करेमाणे सब्बट्टाणेषु सब्बभूमियासु अंतेउरे य दिण्णवियारे जाते यावि होत्था, तते णं से बहस्सतिदत्ते पुरोहिते उदायणस्स रण्णो अंतेउरं वेलासु य अवेलासु य काले य अकाले य राओ य वियाले य पविसमाणे अण्णया कयाई पउमावतीए देवीए सद्धिं संपल्लगे यावि होत्था, पउमावतीए देवीए सद्धिं उरालाइं० भुंजमाणे विहरति, इमं च णं उदायणे सया ण्हाए जाव विभूसिते जेणेव पउमावती देवी तेणेव उवा० ता बहस्सतिदत्तं पुरोहितं पउमावतीए देवीए सद्धिं उरालाइं० भुंजमाणं पासति ता आसुरुत्ते तिवलियं भिउडिं साहट्टु बहस्सतिदत्तं पुरोहितं पुरिसेहिं गिण्हावेति ता जाव एतेणं विहाणेणं वज्झं आणवेति, एवं खलु गोतमा ! बहस्सतिदत्ते पुरोहिते पुरा पोराणाणं जाव विहरति, बहस्सतिदत्ते णं भंते ! दारए पुरोहिते इओ कालगते समाणे कहिं गच्छिहिं कहिं उववज्जिहिं ? गोतमा ! बहस्सतिदत्ते णं दारए पुरोहिते चउसट्ठिं वासाइं परमाउं पालयित्ता अज्जेव तिभागावसेसे दिवसे सुलभिण्णे कते समाणे कालमासे कालं किच्चा इमीसे रयणप्पभाए० संसारो तहेव पुढवी, ततो हत्थिणाउरे णगरे मियत्ताए पच्चायाइस्सति, से णं तत्थ वाउरिएहिं बह्विंते समाणे तत्थेव हत्थिणाउरे णगरे सेट्टिकुलंसि पुत्तत्ताए० बोही० सोहम्म० महावि- देहे० सिज्झिहिं० । णिक्खेवो । २४ ॥ इति बृहस्पतिदत्ताध्ययनं ५ ॥ जति णं भंते !० छट्टस्स उक्खेवो । एवं खलु जंबू ! तेणं कालेणं० महुरा णगरी भंडरी उज्जाणे सुदरिसणे जक्खे सिरिदामे राया बंधुसिरी भारिया पुत्ते णंदिवद्वणे णामं कुमारे अहीण० जाव जुवराया, तस्स सिरिदामस्स सुबंधू नामं अमच्चे होत्था सामदंड०, तस्स णं सुबंधुस्स अमच्चस्स बहुमिच्चापुत्ते णामं दारए होत्था अहीण०, तस्स णं सिरिदामस्स रण्णो चित्ते णामं अलंकारिए होत्था, सिरिदामस्स रण्णो चित्तं बहुविहं अलंकारियकम्मं करेमाणे सब्बट्टाणेषु सब्बभूमियासु य अंतेउरे य दिण्णवियारे यावि होत्था, तेणं कालेणं० सामी समोसठे परिसा राया य निग्गओ जाव परिसा पडिगया, तेणं कालेणं० समणस्स जेट्ठे जाव रायमग्गं ओगाढे तहेव हत्थी आसे पुरिसे तेसिं च णं पुरिसाणं मज्झगयं एगं पुरिसं पासति जाव नरनारीसंपरिवुडं, तते णं तं पुरिसं रायपुरिसा चच्चरंसि तत्तंसि अओमयंसि समजोइभूयसिंहासणंसि निवेसावेति तयाणंतरं च णं पुरिसाणं मज्झगयं बहूहिं अयोक्कलसेहिं तत्तेहिं समजोइभूतेहिं अप्पेगइएहिं तंबभरिएहिं अप्पे० तउयभरिएहिं अप्पे० सीसगभरिएहिं अप्पे० कलकलभरिएहिं अप्पे० खारतेल्लभरिएहिं महया महया रायाभिसेएणं अभि- सिंचंति तयाणंतरं च णं तत्तं अओमयं समजोतिभूयं अओमयं संडासएणं गहाय हारं पिण्णंति तयाणंतरं च णं अद्धहारं जाव पट्टं मउडं चिंता तहेव जाव वागरेति, एवं खलु गोतमा ! तेणं कालेणं० इहेव जंबुदीवे दीवे भारहे वासे सीहपुरे णामं णगरे होत्था रिद्धं०, तत्थ णं सीहपुरे णगरे सीहरहे णामं राया होत्था, तस्स णं सीहरहस्स रण्णो दुज्जोहणे नामं चारगपाले होत्था अधम्मिए जाव दुप्पडियाणंदे, तस्स णं दुज्जोहणस्स चारगपालस्स इमे एयारूवे चार- गभंडे होत्था, तस्स णं दुज्जोहणस्स चारगपालस्स बहवे अयकुंडीओ अप्पेगतियाओ तंबभरियाओ अप्पे० तउयभरियाओ अप्पे० सीसगभरियाओ अप्पे० कलकलभरियाओ अप्पे० खारतेल्लभरियाओ अगणिकायंसि अदहिया चिट्ठंति, तस्स णं दुज्जोहणस्स चारग० बहवे उट्ठियाओ आसमुत्तभरियाओ अप्पे० हत्थिमुत्तभरियाओ अप्पे० उट्ठमुत्तभरियाओ अप्पे० गोमुत्तभरियाओ अप्पे० महिसमुत्तभरियाओ अप्पे० अयमुत्तभरियाओ अप्पे० एलमुत्तभ- रियाओ बहुपडिपुण्णाओ चिट्ठंति, तस्स णं दुज्जोहणस्स चारगपालस्स बहवे हत्थंदुयाण य पायंदुयाण य हडीण य नियलाण य संकलाण य पुंजा निगरा य सण्णिक्खित्ता चिट्ठंति, तस्स णं दुज्जोहणस्स चारगपालस्स बहवे वेणु- लयाण य वेत्तलयाण य चिंचा० छियाण य कसाण य वायरासीण य पुंजा निगरा चिट्ठंति, तस्स णं दुज्जोहणस्स चा० बहवे सिलाण य लउडाण य मुग्गराण य कणंगराण य पुंजा निगरा चिट्ठंति, तस्स णं दुज्जोहणस्स बहवे तंतीण य वरत्ताण य वागरज्जूण य वालरज्जूण य सुत्तरज्जूण य पुंजा निगरा य संनिक्खित्ता चिट्ठंति, तस्स णं दुज्जोहणस्स बहवे असिपत्ताण य करपत्ताण य खुरपत्ताण य कलंबचीरपत्ताण य पुंजा निगरा चिट्ठंति, तस्स णं दुज्जोहणस्स चारग० बहवे लोहखीलाण य कडसक्कराण य चम्मपट्टाण य अन्ताण य पुंजा निगरा चिट्ठंति, तस्स णं दुज्जोहणस्स चारग० बहवे सूईण य डंभणाण य कोट्टिल्लाण य पुंजा निगरा चिट्ठंति, तस्स णं दुज्जोहणस्स चारग० बहवे सत्थाण य पिप्पलाण य कुहाडाण य नहल्लेयणाण य दम्भाण य पुंजा निगरा चिट्ठंति, तते णं से दुज्जोहणे चारगपाले सीहरहस्स रण्णो बहवे चोरे य पारदारिए य गंठिभेदे य रायावगारी य अणधारए य बालघाती य वीसंभघाती य जूति- कारे य खंडपट्टे य पुरिसेहिं गेण्हावेति ता उत्ताणए पाडेति ता लोहदंडेणं मुहं विहाडेति ता अप्पेगतिए तत्ततंबं पज्जेति अप्पेगतिए तउयं पज्जेति अप्पेगतिए सीसगं पज्जेति अप्पे० कलकलं प० अप्पे खारतेल्लं प० अप्पेगतियाणं तेणं चेव अभिसेगं करेति अप्पे० उत्ताणे पाडेति ता आसमुत्तं पज्जेति अप्पे० हत्थिमुत्तं पज्जेति जाव एलमुत्तं पज्जेति अप्पे० हेट्टामुहे पाडेति छलछलस्स वमावेति ता अप्पेगतियाणं तेणं चेव ओवीलं दलयति अप्पे० हत्थंदुयाहिं बंधा- वेइ अप्पे० पायंदुयाहिं अप्पे० हडिबंधणं करेति अप्पे० नियलबंधणं करेति अप्पे० संकोडियमोडियए करेति अप्पे० संकलबंधणे करेति अप्पे० हत्थिल्लिण्णए करेति जाव सत्थोवाडिए करेति अप्पे० वेणुलयाहि य जाव वायरासीहि य (प्र० पहरणातिहि य) हणावेति अप्पे० उत्ताणए कारवेति उरे सिलं दलावेति ता लउलं लुभावेति ता पुरिसेहिं उक्कंपावेति अप्पे० तंतीहि य जाव सुत्तरज्जूहि य हत्थेसु य पादेसु य बंधावेति अगडंसि उच्चूलं बोलगं पज्जेति अप्पे० असिपत्तेहि य जाव कलंबचीरपत्तेहि य पच्छावेति खारतेल्लेणं अम्भगावेति अप्पेगतियाणं णिडालेसु य अवडूसु य कोप्परेसु य जाणूसु य खलुएसु य लोहकीलए य कडसक्कराओ य दवावेति अल्लिए भंजावेति अप्पेगतियाणं सूईओ य दंभणाणि य हत्थंगुलियासु पायंगुलियासु य कोट्टिल्लएहिं आओडावेति ता भूमिं कंडूयावेति अप्पे० सत्थएहि य जाव नहल्लेदणएहि य अंगं पच्छावेइ दम्भेहि य कुसेहि य उल्लचम्म(वद्धे)हि य वेढावेति आयवंसि दलयति ता सुक्खे समाणे चडचडस्स उप्पाडेति, तते णं से दुज्जोहणे चार० एयकम्म० सुबहुं पावं समज्जिणित्ता एगवीसं वाससताइं परमाउं पालयित्ता कालमासे कालं किच्चा छट्ठीए पुढवीए उक्कोसेणं बावीससागरोवमट्ठितीएसु नेरइएसु नेरइ- यत्ताए उववण्णे । २५ । से णं ततो अणंतरं उव्वट्ठित्ता इहेव महुराए णयरीए सिरिदामस्स रन्नो बंधुसिरीए देवीए कुच्छिंसि पुमत्ताए उववण्णे, तते णं बंधुसिरी नवण्हं मासाणं बहुपडिपुण्णाणं जाव दारगं पयाया, तते णं तस्स दारगस्स

अम्मापितरो णिब्रत्ते बारसाहे इमं एयारूवं णामधेज्जं करेति-होउ णं अम्हं दारगे णंदिसेणे नामेणं, तते णं से णंदिसेणे कु० पंचधातीपरिवुडे जाव परिवड्ढति, तते णं से णंदिसेणे कुमारे उम्मुक्कबालभावे जाव विहरति जाव जुवराया जाते यावि होत्था, तते णं से णंदिसेणे कुमारे रज्जे य जाव अंतेउरे य मुच्छित्ते इच्छति सिरिदामं रायं जीविताओ ववरोवित्तए सयमेव रज्जसिरिं कारेमाणे पालेमाणे विहरित्तए, तते णं से णंदिसेणे कुमारे सिरिदामस्स रण्णो बहूणि अंतराणि य छिद्दाणि य विरहा(वरा)णि य पडिजागरमाणे विहरति, तते णं से णंदिसेणे कुमारे सिरिदामस्स रण्णो अंतरं० अलभमाणे अण्णया कयाई चित्तं अलंकारियं सद्दावेति त्ता एवं व०-तुमं णं देवाणु० सिरिदामस्स रण्णो सव्व द्वाणेसु सव्वभूमिसु अंतेउरे य दिण्णवियारे सिरिदामस्स रण्णो अभिक्खणं अलंकारियं कम्मं करेमाणे विहरसि, तण्णं तुमं देवाणुप्पिया ! सिरिदामस्स रण्णो अलंकारियं कम्मं करेमाणे गीवाए खुरं निवेसेहि तण्णं अहं तुमं अद्वरज्जियं करिस्सामि तुमं अम्हेहिं सद्धिं उरालाइं भोगभोगाइं भुंजमाणे विहरिस्ससि, तते णं से चित्ते अलंकारिए णंदिसेणस्स कुमारस्स वयणं एयमट्ठं पडिसुणेति, तते णं तस्स चित्तस्स अलंकारियस्स इमे एयारूवे जाव समुप्पज्जित्था-जति णं ममं सिरिदामे राया एयमट्ठं आगमेति तते णं ममं ण णज्जति केणई असुभेणं कुमारेणं मारिस्सतित्तिकट्ठु भीए जेणेव सिरिदामे राया तेणेव उवा० त्ता सिरिदामं रायं रहस्सियं करयल० जाव एवं व०-एवं खलु सामी ! णंदिसेणे कुमारे रज्जे जाव मुच्छित्ते इच्छति तुम्हे जीविताओ ववरोवेत्ता सयमेव रज्जसिरिं कारेमाणे पालेमाणे विहरित्तए, तते णं से सिरिदामे राया चित्तस्स अलंकारियस्स अंतिए एयमट्ठं सोच्चा निसम्म आसुरुत्ते जाव साहट्ठु णंदिसेणं कुमारं पुरिसेहिं सद्धिं गेण्हावेति त्ता एएणं विहाणेणं वज्झं आणवेति, तं एवं खलु गोतमा ! णंदिसेणे पुत्ते जाव विहरति, णंदिसेणे कुमारे इओ चुते कालमासे कालं किच्चा कहिं गच्छिहिति कहिं उववज्जिहिति ?, गोतमा ! णंदिसेणे कुमारे सद्धिं वासाइं परमाउं पालयित्ता कालमासे कालं किच्चा इमीसे रयणप्पभाए पुढवीए संसारो तहेव ततो हत्थिणाउरे णगरे मच्छत्ताए उववण्णे, से णं तत्थ मच्छिहं वहिते समाणे तत्थेव सिद्धिकुले० बोही० सोहम्मे महाविदेहे० सिज्झिहिति०, एवं खलु जम्बू ! णिक्खेवो छट्ठस्स अज्झयणस्स अयमट्ठे पण्णत्तेत्तिवेमि । २६ ॥ इति नन्दिसेणज्झयणं ६ ॥ जति णं भंते !० उक्खेवो सत्तमस्स, एवं खलु जम्बू ! तेणं कालेणं० पाडलिसंडे णगरे वणसंडे नामं उज्जाणे उंबरदत्तो जक्खो, तत्थ णं पाडलिसंडे णगरे सिद्धत्थे राया, तत्थ णं पाडलिसंडे सागरदत्ते सत्थवाहे होत्था अड्ढे०, गंगदत्ता भारिया, तस्स णं सागरदत्तस्स पुत्ते गंगदत्ताए भारियाए अत्तए उंबरदत्ते नामं दारए होत्था अहीण०, तेणं कालेणं० (प्र० समणस्स भगवओ) समोसरणं जाव परिसा पडिगता, तेणं कालेणं० भगवं गोतमे तहेव जेणेव पाडलिसंडे णगरे तेणेव उवा० पाडलिसंडं णगरं पुरच्छिमिल्लेणं दारेणं अणुप्पविसति तत्थ णं पासति एगं पुरिसं कच्छुल्लं कोढियं दओयरियं भगंदरियं अरिसिल्लं कासिल्लं (प्र० घासिल्लं) सोसिल्लं सासि(सोगि)ल्लं सूयमुहं सूयहत्थं सूयपायं सडियहत्थगुलियं सडियपायंगुलियं सडितकण्णनासियं रसियाए य पूएण य थिविथिवितं वणमुहकि-मिउत्तुयंतपगलंतपूरुहिरं लालापगलंतकण्णणासं अभिक्खणं २ पूयकवले य रुहिरकवले य किमियकवले य वममाणं कट्ठाइं कलुणाइं वीसराइं कूवमाणं मच्छियाचडगरपहगरेणं अण्णिज्जमाणमग्गं फुट्टहडाहडसीसं दंडिखंडनिवसणं खंडमल्लखंडघडहत्थगयं गेहे २ देहंबलियाए वित्तिं कप्पेमाणं पासति त्ता तदा भगवं० भत्तपाणं आलोएति भत्तपाणं पडिदंसेति त्ता समणेणं० अब्भणुणाते जाव बिलमिव पन्नगभूतेणं अप्पाणेणं आहारमाहारेइ संजमेणं तवसा अप्पाणं भावेमाणे विहरति, तते णं से भगवं गोतमे दोच्चंमि छट्ठकखमणपारणगंसि पढमाए पोरिसीए जाव पाडलिसंडं णगरं दाहिणिल्लेणं दुवारेणं अणुप्पविसति तं चेव पुरिसं पासति कच्छुल्लं तहेव जाव संजमे० विहरति, तते णं से गोतमे तच्चंमि छट्ठ० तहेव जाव पच्चत्थिमिल्लेणं दुवारेणं अणुपविसमाणे तं चेव पुरिसं कच्छु० पासति चोत्थल्लट्ठ० उत्तरेणं० इमे अज्झत्थिए० समुप्पण्णे-अहो णं इमे पुरिसे पुरा पोरणाणं जाव एवं व०-एवं खलु अहं भंते ! छट्ठस्स पारणयंसि जाव रियंते जेणेव पाडलिसंडे तेणेव उवा० त्ता पाडलि० पुरच्छिमिल्लेणं दारेणमणुप्पविट्ठे तत्थ णं एगं पुरिसं पासामि कच्छुल्लं जाव कप्पेमाणं तं अहं दोच्चंमि छट्ठ० पारणगंसि दाहिणिल्ले दारे तहेव तच्चंमि छट्ठ० पच्चत्थिमेण तहेव तं अहं चउत्थे छट्ठ० पारणे उत्तरदारेण अणुपविसामि तं चेव पुरिसं पासामि कच्छुल्लं जाव वित्तिं कप्पेमाणे विहरति, चिंता ममं पुव्वभवपुच्छा वागरेति-एवं खलु गोतमा ! तेणं कालेणं० इहेव जंबुदीवे दीवे भारहे वासे विज-यपुरे णामं णगरे होत्था रिद्ध०, तत्थ णं विजयपुरे णगरे कणगरहे णामं राया होत्था०, तस्स णं कणगरहस्स रण्णो धण्णंतरी णामं वेज्जे होत्था अट्ठंगाउव्वेदपाढए तं०-कोमारभिच्चं सलागे (प्र० सालगे) सल्लहत्ते कायतिगिच्छा जंगोले भूयवेज्जे रसायणे वाजीकरणे सिवहत्थे सुहहत्थे लहुहत्थे, तते णं से धण्णंतरी वेज्जे विजयपुरे णगरे कणगरहस्स रण्णो अंतेउरे य अण्णेसिं च बहूणं राईसर० जाव सत्थवाहाणं अण्णेसिं च बहूणं दुब्बलाण य गिलाणाण य वाहियाण य रोगियाण य सणाहाण य अणाहाण य समणाण य माहणाण य भिक्खागाण य करोडियाण य कप्पडियाण य आउराण य अप्पेगतियाणं मच्छमंसाइं उवदिसति अप्पे० कच्छममं० अप्पे० गाहमं० अप्पे० मगरमं० अप्पे० सुंसुमारमं० अप्पे० अयमंसाइं एवं एलरोज्झसूयरमिगससयगोमहिसमंसाइं अप्पे० तित्तिरमंसाइं अप्पे० वट्ठ० कलावक० कवोत० कुक्कुडमयूर० अण्णेसिं च बहूणं जलयरथलयरखहयरमादीणं मंसाइं उवदंसेति अप्पणावि य णं से धण्णंतरी वेज्जे तेहिं बहूहिं मच्छमंसेहि य जाव मयूरमंसेहि य० अण्णेहिं बहूहि य जलयरथलयरखहयरमंसेहि य मच्छरसेहि य जाव मयूररसेहि य सोल्लेहिं तल्लिएहिं भज्जिएहि य सुरं च० आसाएमाणे० विहरति, तते णं से धण्णं-तरी वेज्जे एयकम्मे सुबहुं पावकम्मं समज्जिणित्ता बत्तीसं वाससताइं परमाउं पालयित्ता कालमासे कालं किच्चा छट्ठीए पुढवीए उक्कोसेणं बावीससागरोवम० उववण्णे, तते णं सा गंगदत्ता भारिया जाव णिंदुया यावि होत्था जाता २ दारगा विणिघायमावज्जंति, तते णं तीसे गंगदत्ताए सत्थवाहीए अण्णया कयाई पुव्वरत्तावरत्त० कुटुंबजागरियं जागरमाणीए अयमेयारूवे अज्झत्थिए० समुप्पण्णे-एवं खलु अहं सागरदत्तेणं सत्थवाहेणं सद्धिं बहूइं वासाइं उरालाइं माणुस्सगाइं भोगभोगाइं भुंजमाणी विहरामि णो चेव णं अहं दारगं वा दारियं वा पयामि तं धण्णाओ णं ताओ अम्मयाओ सपुण्णाओ कयत्थाओ कयलक्खणाओ सुलद्धे णं तासिं अम्मयाणं माणुस्सए जम्मजीवियफले जासिं मण्णे नियगकुच्छिसंभूयाइं थणदुद्धलुद्धगाइं महुरसमुल्लावगाइं मम्मणपयंपियाइं थणमूलकक्खदेसभागं अभिसरमाणगाइं पुणो य कोमलकमलोवमेहिं हत्थेहिं गेण्हिरुणं उच्छंगनिवेसियाइं दिंति समुल्लावए सुमहुरे पुणो २ मंजु-लप्पभणिते अहं णं अधण्णा अपुण्णा अकयपुण्णा एत्तो एगमवि न पत्ता तं सेयं खलु ममं कल्ले जाव जलंते सागरदत्तं सत्थवाहं आपुच्छित्ता सुबहुं पुप्फवत्थगंधमल्लालंकारं गहाय बहूहिं मित्तणातिणियगसयणसंबंधिपरि- (१३७)

जणमहिलाहिं सद्धिं पाडलिसंडाओ णगराओ पडिणिक्खमिक्खत्ता बहिया जेणेव उंबरदत्तस्स जक्खस्स जक्खायतणे तेणेव उवागच्छित्ता तत्थ णं उंबरदत्तस्स जक्खस्स महिरिहं पुप्फच्चणं करेत्ता जाणुपादपडियाए उवाइणित्तए जति णं अहं देवाणुप्पिया ! दारगं वा दारियं वा पयामि तो णं अहं तुभं जायं च दायं च भायं च अक्खयणिहिं च अणुवड्ढेस्सामित्तिकट्टु ओवाइयं उवाइणित्तए एवं संपेहेति त्ता कल्लं जाव जलंते जेणेव सागरदत्ते सत्थवाहे तेणेव उवागच्छति त्ता सागरदत्तं सत्थवाहं एवं व०-एवं खलु अहं देवाणु० ! तुभेहिं सद्धिं जाव न पत्ता तं इच्छामि णं देवाणु० ! तुभेहिं अब्भणुण्णाता जाव उवाइणित्तए, तते णं से सागरदत्ते गंगदत्तं भारियं एवं व०-ममंपि य णं देवाणुप्पिए ! एसच्चेव मणोरहे-कहं णं तुमं दारगं वा दारियं वा पयाएजसि ?, गंगदत्तं भारियं एयमट्ठं अणुजाणति, तते णं सा गंगदत्ता भारिया सागरदत्तसत्थवाहेणं एतमट्ठं अब्भणुण्णाता समाणी सुबहुं पुप्फ० जाव महिलाहिं सद्धिं सातो गिहातो पडिणिक्खमति त्ता पाडलिसंडं णगरं मज्झमज्झेणं निग्गच्छइ त्ता जेणेव पुक्खरिणीतीरे तेणेव उवागच्छति त्ता पुक्खरिणीए तीरे सुबहुं पुप्फवत्थगंधमल्लालंकारं उवणेति त्ता पुक्खरिणीं ओगाहेति त्ता जलमज्जणं करेति त्ता जलकिड्डं करेमाणी ण्हाया कयकोउयमंगलपायच्छित्ता उल्लगपडसाडिया पुक्खरिणीओ पच्चुत्तरति त्ता तं पुप्फ० गेण्हति त्ता जेणेव उंबरदत्तस्स जक्खस्स जक्खायतणे तेणेव उवा० त्ता उंबरदत्तस्स जक्खस्स आलोए पणामं करेति त्ता लोमहत्थं परामुसति त्ता उंबरदत्तं जक्खं लोमहत्थएणं पमज्जति त्ता दगधाराए अब्भुक्खेति त्ता पम्हल० गायलट्टीओ लूहेति त्ता सेयाइं वत्थाइं परिहेति महिरिहं पुप्फारूहणं वत्थारूहणं गंधारूहणं चुण्णारूहणं करेति त्ता धूवं डहति जाणुपायपडिया एवं व०-जति णं अहं देवाणु० ! दारगं वा दारियं वा पयामि तो णं जाव उवाइणति जामेव दिसं पाउब्भूता तामेव दिसं पडिगता, तते णं से धण्णंतरी वेज्जे तातो णरगाओ अणंतरं उव्वट्ठित्ता इहेव पाडलिसंडे णगरे गंगदत्ताए भारियाए कुच्छिसि पुत्तत्ताए उववणे, तते णं तीसे गंगदत्ताए भारियाए तिण्हं मासाणं बहुपडिपुण्णाणं अयमेयारूवे डोहले पाउब्भूते-धण्णाओ णं ताओ जाव फले जाओ णं विउलं असणं० उवक्खडावेति त्ता बहूहिं मित्त जाव परिवुडाओ तं विउलं असणं० सुरं च० पुप्फजाव गहाय पाडलिसंडं नगरं मज्झमज्झेणं पडिनि० जेणेव पुक्खरिणी तेणेव उवा० त्ता पुक्खरिणीं ओगाहंति ण्हाया जाव पायच्छित्ताओ तं विउलं असणं० बहूहिं मित्तनाति जाव सद्धिं आसादेति दोहलं विणएति एवं संपेहेति त्ता कल्लं जाव जलंते जेणेव सागरदत्ते सत्थवाहे तेणेव उवा० सागरदत्तं सत्थवाहं एवं व०-धन्नाओ णं ताओ जाव विणेंति तं इच्छामि णं जाव विणित्तए, तते णं से सागरदत्ते सत्थवाहे गंगदत्ताए भारियाए एयमट्ठं अणुजाणति, तते णं सा गंगदत्ता सागरदत्तेणं सत्थवाहेणं अब्भणुण्णाया समाणी विउलं असणं० उवक्खडावेति तं विउलं असणं० सुरं च० सुबहुं पुप्फ० परिगेण्हावेति बहूहिं जाव ण्हाया कय० जेणेव उंबरदत्तस्स जक्खायतणे जाव धूवं डहति त्ता जेणेव पुक्खरिणी तेणेव उवागच्छति, तते णं ताओ मित्त० जाव महिलाओ गंगदत्तं सत्थ० सब्बालंकारविभूसियं करेंति, तते णं सा गंगदत्ता भारिया ताहिं मित्त० अण्णाहि य बहूहिं णगरमहिलाहिं सद्धिं तं विउलं असणं० सुरं च० आसाएमाणी० दोहलं विणेति त्ता जामेव दिसं पाउब्भूता तामेव दिसं पडिगता, तते णं सा गंगदत्ता भारिया पसत्थ(पुण्ण)दोहला तं गम्भं सुहंसुहेणं परिवहति, तते णं सा गंगदत्ता भारिया णवण्हं मासाणं जाव पयाया ठिइ० जाव-जम्हा णं अम्हं इमे दारए उंबरदत्तस्स जक्खस्स उवाइयलद्धए तं होउ णं दारए उंबरदत्ते नामेणं, तते णं से उंबरदत्ते दारए पंचधातीपरिग्गहिते परिवड्ढति, तते णं से सागरदत्ते सत्थवाहे जहा विजयमित्ते जाव कालमासे कालं किच्चा० गंगदत्तावि, उंबरदत्ते निच्छूढे जहा उज्झियए, तते णं तस्स उंबरदत्तस्स दारयस्स अण्णया कयाइं सरीरगंसि जमगसमगमेव सोलस रोगायंका पाउब्भूया तं०-सासे खासे जाव कोढे, तते णं से उंबरदत्ते दारए सोलसहिं रोगायंकेहिं अभिभूते समाणे सडियहत्थे० जाव विहरति, एवं खलु गोतमा ! उंबरदत्ते दारए पुरा जाव पच्चणुब्भवमाणे विहरति, तते णं से उंबरदत्ते दारए कालमासे कालं किच्चा कहिं गच्छिहिति कहिं उववज्जिहिति ?, गोतमा ! उंबरदत्ते दारए बावत्तरिं वासाइं परमाउं पालयित्ता कालमासे कालं किच्चा इमीसे रयणप्पभाए पुढवीए णेरइयत्ताए उववणे संसारो तहेव जाव पुढवी, ततो हत्थिणाउरे णगरे कुक्कुडत्ताए पच्चायाहिति (प्र० जायमेत्ते चेव) गोट्टिल्लवहिते तहेव हत्थिणाउरे सेट्टी नगरे बोही सोहम्मे महाविदेहे सिज्झिहिति०। णिक्खेवो । २७॥ इति उंबरदत्ताध्ययनं ७॥ जति णं भंते ! अट्टमस्स उक्खेवो । एवं खलु जंबू ! तेणं कालेणं० सोरियपुरं णगरं सोरियवडिंसगं उज्जाणं सोरियो जक्खो सोरियदत्तो राया, तस्स णं सोरियपुरस्स णगरस्स बहिया उत्तरपुरच्छिमे दिसीभाए एत्थ णं एगे मच्छंधपाडए होत्था, तत्थ णं समुद्धत्ते नामं मच्छंधे परिवसति अहम्मिए जाव दुप्पडियाणंदे, तस्स णं समुद्धत्तस्स समुद्धत्ता नामं भारिया होत्था अहीण०, तस्स णं समुद्धत्तस्स मच्छंधस्स पुत्ते समुद्धत्ताए भारियाए अत्तए सोरियदत्ते नामं दारए होत्था अहीण०, तेणं कालेणं० सामी समोसडे जाव पडिगया, तेणं कालेणं० जेट्ठे सिस्से जाव सोरियपुरे णगरे उच्चनीय० अहापजत्तं समुदाणं गहाय सोरियपुराओ णगराओ पडिनिक्खमति तस्स मच्छंधपाडगस्स अदूरसामंतेणं वीईवयमाणे महतिमहालियाए मणुस्सपरिसाए मज्झगयं पासइ एगं पुरिसं सुक्खं भुक्खं णिम्मसं अट्टिचग्गमावणद्धं किडिकिडियाभूयं णीलसाडगनियत्थं मच्छकंटएण गलए अणुलग्गेणं कट्टाइं कलुणाइं विसराइं उक्कूवेमाणं अभिक्खणं २ पूयकवले य रुहिरकवले य किमिकवले य वममाणं पासति इमे अज्झत्थिए० पुरा जाव विहरति एवं संपेहेति त्ता जेणेव समणे भगवं० जाव पुब्रभवपुच्छा जाव वागरणं, एवं खलु गोतमा ! तेणं कालेणं० इहेव जंबूदीवे दीवे भारहे वासे णंदिपुरे णामं णगरे होत्था, मित्ते राया, तस्स णं मित्तस्स रन्नो सिरिए नामं महाणसिए होत्था अहम्मिए जाव दुप्पडियाणंदे, तस्स णं सिरियस्स महाणसियस्स बहवे मच्छिया य वागुरिया य साउणिया य दिण्णभति० कल्ला-कल्लिं बहवे सण्हमच्छा य जाव पडागातिपडागे य अए य जाव महिसे य तित्तिरे य जाव मयूरे य जीविताओ ववरोवेति त्ता सिरियस्स महाणसियस्स उवणेंति अण्णे य से बहवे तित्तिरा य जाव मयूरा य पंजरंसि संनिरुद्धा चिट्ठंति अण्णे य बहवे पुरिसा दिण्णभति० ते बहवे तित्तिरे य जाव मयूरे य (प्र० जीवंतए) चेव निपंखेंति सिरियस्स महाणसियस्स उवणेंति, तते णं से सिरिए महाणसिए बहूणं जलयरथलयरखहयराणं मंसाइं कप्पणीकप्पियाइं करेति तं० सण्हखंडियाणि य बट्ठ०दीह०रहस्स०हिमपक्काणि य जम्मघम्म(वेग)मारुपक्काणि य कालाणि य हेरंगाणि य महिट्ठाणि य आमलरसियाणि य मुद्धिया०कविट्ठ०दालिमरसियाणि० मच्छरसि० तलियाणि य भजियाणि य

य सोल्लियाणि य उवक्खडावेति अण्णे य बहवे मच्छरसए य एणेजरसए य तित्तिर० जाव मयूरसए य अण्णं विउलं हरियसागं उवक्खडावेति ता मित्तस्स रण्णो भोयणमंडवंसि भोयणवेलाए उवणेइ अप्पणावि य णं से सिरिए महाणसिए तेसिं च बहूहिं जाव ज० थ० ख० मंसेहिं रसएहि य हरियसागेहि य सोल्लेहि य तलेहि य भज्जेहि य सुरं च० आसादे० विहरति, तते णं से सिरिए महाणसिए एयकम्मे सुबहुं जाव समज्जिणित्ता तेत्तीसं वाससयाइं परमाउं पालयित्ता कालमासे कालं किच्चा छट्ठीए पुढवीए उववण्णे, तते णं सा समुदत्ता भारिया निंदुया यावि होत्था, जाया २ दारगा विणिघायमावज्जंति, जहा गंगदत्ताए चिंता आपुच्छणा उवातियं दोहलो जाव दारगं पयाता जाव जम्हा णं अम्हं इमे दारए सोरियस्स जक्खस्स उवाइयलद्धए तम्हा णं होउ अम्हं दारए सोरियदत्ते णामेणं, तते णं से सोरियदत्ते दारए पंचधाई० जाव उम्मुक्कबालभावे विण्णायपरिणयमेत्ते जोव्वण० होत्था, तते णं से समुदत्ते अण्णया कयाई कालधम्मणा संजुत्ते, तते णं से सोरियदत्ते दारए बहूहिं मित्त० रोयमाणे समुदत्तस्स णीहरणं करेति ता लोइयाइं मयकिच्चाइं करेति अण्णया कयाई सयमेव मच्छंधमहत्तरगतं उवसंपज्जित्ताणं विहरति, तते णं से सोरिए दारए मच्छंधे जाते अधम्मिए दुप्पडियाणंदे, तते णं तस्स सोरियमच्छंधस्स बहवे पुरिसा दिण्णभति० कल्लाकल्लिं एगट्टियाहिं जउणं महाणदिं ओगाहिंति ता बहूहि य दहगलणेहि य दहमलणेहि य दहमदणेहि य दह-महणेहि य दहवहणेहि य दहपवाहणेहि य अयंपुलेहि य पयंपुलेहि य जंभाहि य तिसराहि य भिसराहि य घिसराहि य विसराहि य हिल्लीरीहि य झिल्लीरीहि य लल्लिरीहि य जालेहि य गलेहि य कूडपासेहि य वक्कबंधेहि य सुत्त-बंधेहि य बालबंधेहि य बहवे सण्हमच्छे य जाव पडागातिपडागे य गेण्हंति ता एगट्टियाउ भरेति ता कूलं गाहेति ता मच्छखलए करेति आयवंसि दलयंति अप्पणाऽविय णं से सोरिये मच्छंधए कल्लाकल्लिं एगट्टिताए जउणं महाणदिं ओगाहेति ता सरिसवच्छिदपमाणमेत्तेणं जालेणं बहवे सण्हमच्छे य जाव गेण्हति एगट्टियं भरेति कूलं गाहेति ता मच्छखलए करेति आयवंसि दलयति, अण्णे य से बहवे पुरिसा दिण्णभइभत्त० आयवतत्तएहिं मच्छेहिं सोल्लिएहि य तल्लिएहिं भजितेहि य रायमग्गंसि वित्तिं कप्पेमाणा विहरंति, अप्पणाविय से सोरियदत्ते बहूहिं सण्हमच्छेहिं जाव पडागा० सोल्लिएहि य त० भ० सुरं च० आसादे० विहरति, तते णं तस्स सोरियदत्तस्स मच्छंधस्स अण्णया कयाई ते मच्छ० सोल्ले य तलि० भज्जि० आहारेमाणस्स मच्छकंटए गले लगे यावि होत्था, तते णं से सोरिय० महइए वेयणाए अभिभूते समाने कोडुंबियपुरिसे सदावेति ता एवं व०-गच्छह णं तुम्भे देवा०! सोरियपुरे णगरे सिंघाडगजावपहेसु महया सदेणं उग्घोसेमाणा २ एवं वयह-एवं खलु देवा०! सोरियस्स मच्छकंटए गले लगे तं जो णं इच्छति वेज्जो वा० सोरियमच्छियस्स मच्छकंटयं गलाओ नीहरित्तए० तस्स णं सोरिए विउलं अत्थसंपयाणं दलयति, तते णं ते कोडुंबियपुरिसा जाव उग्घोसंति, तए णं ते बहवे वेज्जा य० इमं एयारूवं उग्घोसणं उग्घोसिज्जमाणं निसामंति ता जेणेव सोरियगिहे जेणेव सोरिए मच्छंधे तेणेव उवा० ता बहूहिं उप्पत्तियाहि य० बुद्धीहिं परिणामेमाणा वमणेहि य छड्डणेहि य ओवीलणेहि य कवलग्गाहेहि य सल्लुद्धरणेहि य विसल्लुकरणेहि य इच्छंति सोरियमच्छंधस्स मच्छकंटगं गलाओ नीहरित्तए० नो चेव णं संचाएंति नीहरित्तए वा विसोहित्तए वा, तते णं ते बहवे वेज्जा य० जाहे नो संचाएंति सोरियस्स मच्छकंटगं गलाओ नीहरित्तए वा विसोहित्तए वा ताहे संता जाव जामेव दिसं पाउब्भूता तामेव दिसं पडिगता, तते णं से सोरिए मच्छंधे वेज्जपडियारनिव्विण्णे तेणं दुक्खेणं महया अभिभूते सुक्के जाव वि-हरति, एवं खलु गोतमा! सोरियदत्ते पुरा पोराणाणं जाव विहरति, सोरिए णं भंते! मच्छंधे इओ कालमासे कालं किच्चा कहिं गच्छिहिति कहिं उववज्जिहिति?, गोतमा!० सत्तरिं वासाइं परमाउं पालयित्ता कालमासे कालं किच्चा इमीसे रयणप्पभाए संसारो तहेव जाव पुढवी ततो हत्थिणाउरे मच्छत्ताए उववज्जिहिति, से णं ततो मच्छिएहिं जीवियाओ ववरोविते तत्थेव सिट्ठिकुलंसि बोही सोहम्मे महाविदेहे वासे सिज्झिहिति०। निक्खेवो। २८॥ इति शौरि-कदत्ताध्ययनं ८॥ जति णं भंते!० उक्खेवो णवमस्स। एवं खलु जम्बू! तेणं कालेणं० रोहीडए नामं णगरे होत्था रिद्ध०, पुढवीवडंसए उज्जाणे धरणे जक्खे वेसमणदत्ते राया सिरि देवी पूसणंदी कुमारे जुवराया, तत्थ णं रोहीडए णगरे दत्ते णामं गाहावती परिवसति अड्ढे० कण्हसिरी भारिया तस्स णं दत्तस्स धूया कण्हसिरीए अत्तया देवदत्ता नामं दारिया होत्था अहीण० जाव उक्किट्टसरीरा, तेणं कालेणं० सामी समोसडे जाव परिसा निग्गता, तेणं कालेणं० जेट्ठे अंतेवासी छट्ठक्खमण० तहेव जाव रायमग्गं ओगाडे हत्थी आसे पुरिसे पासति तेसिं पुरिसाणं मज्झगयं पासति एगं इत्थियं अवओडगबंधणं उक्कित्तक० जाव सूले भिज्जमाणं पासति, इमे अज्झत्थिए तहेव णिग्गते जाव एवं व०-एसा णं भंते! इत्थिया पुव्वभवे का आसी?, एवं खलु गोयमा! तेणं कालेणं० इहेव जंबुद्धीवे दीवे भारहे वासे सुपतिट्ठे णामं णगरे होत्था रिद्ध० महासेणे राया तस्स णं महासेणस्स धारिणीपामुक्खं देवीसहस्सं ओराधे यावि होत्था, तस्स णं महासेणस्स पुत्ते धारिणीए देवीए अत्तए सीहसेणे णामं कुमारे होत्था अहीण० जुवराया, तते णं तस्स सीहसेणस्स कुमारस्स अम्मापितरो अण्णया कयाई पंच पासायवडंसगसयाइं करेति अब्भुगत० तते णं तस्स सीहसेणस्स कुमारस्स अण्णया कयाई सामापामोक्खाणं पंचण्हं रायवरकण्णगसयाणं एगदिवसेणं पाणिं गेण्हार्वेसु पंचसयओ दाओ, तते णं से सीहसेणे कुमारे सामापामोक्खेहिं पंचहिं देवीसतेहिं सद्धिं उप्पि० जाव विहरति, तते णं से महासेणे राया अण्णया कयाई कालधम्मणा संजुत्ते, नीहरणं, राया जाते महया०, तते णं से सीहसेणे राया सामाए देवीए मुच्छिते अवसेसाओ देवीओ णो आढाति णो परिजाणाति अणाढायमाणे अपरिजाणमाणे विह-रति, तते णं तासिं एगूणगाणं पंचण्हं देवीसयाणं एकूणाइं पंच माईसयाइं इमीसे कहाए लद्धट्टाइं सवणयाए-एवं खलु सीहसेणे राया सामाए देवीए मुच्छिते अम्हं धूयाओ नो आढाति नो परिजाणाति अणा० विहरति, तं सेयं खलु अम्हं सामं देविं अग्गिप्पओगेण वा विसप्प० सत्थप्प० जीवियाओ ववरोवित्तए, एवं संपेहेति सामाए देवीए अंतराणि य छिद्दाणि य विवराणि य पडिजागरमाणीओ विहरंति, तते णं सा सामा देवी इमीसे कहाए लद्धट्टा सवणयाए एवं व०-एवं खलु ममं पंचण्हं सवत्तीसयाणं पंच माईसयाइं इमीसे कहाए लद्धट्टाइं समाणाइं अण्णमण्णं एवं व०-एवं खलु सीहसेणे जाव पडिजागरमाणीओ विहरंति, तं न नज्जति णं ममं केणति कुमरणेणं मारिस्संतित्तिकट्टु भीया जेणेव कोवघरे तेणेव उवा० ओहय० जाव झियाति, तते णं से सीहसेणे राया इमीसे कहाए लद्धट्टे समाणे जेणेव कोवघरे जेणेव सामा देवी तेणेव उवा० ता सामं देविं ओहय० पासति ता एवं व०-किण्णं देवा०! ओहय०

जाव झियासि?, तते णं सा सामा देवी सीहसेणेण रण्णा एवं वुत्ता समाणा उप्फणउप्फणियं सीहसेणं रायं एवं व०-एवं खलु सामी! ममं एकूणपंच सवत्तीसयाणं एकूणपंच माईसयाइं इ० क० ल० स० अण्णमण्णं सदावेति ता एवं व०-एवं खलु सी० रा० सा० दे० मु० अम्हाणं धूयाओ णो आढा० जाव अंतराणि पडि० विहरंति, तं णं नज्जति० भीया जाव झियामि, तते णं से सीहसेणे राया सामं देवि एवं व०-मा णं तुमं देवा०! ओहत० जाव झियाहि अहं णं तहा घत्तिहामि जहा णं तव नत्थि कत्तोवि सरीरस्स आबाहे वा पबाहे वा भविस्सत्तित्तिक्कट्टु ताहिं इट्ठाहिं० समासासेति ततो पडिनिक्खमति ता कोडुंबियपुरिसे सदावेति ता एवं व०-गच्छह णं तुम्हे देवाणु०! सुपइट्टस्स नगरस्स बहिया एगं महं कूडागारसालं करेह अणेगखंभ० पासा० एयमट्ठं पच्च०, तते णं ते कोडुंबियपुरिसा करतल० जाव पडि० ता सुपइट्टियनगरस्स बहिया पच्चत्थिमे दिसीभागे एगं महं कूडागारसालं जाव करेति अणेग० पासा० जेणेव सीह० राया तेणेव उवा० ता तमाणत्तियं पच्च०, तते णं से सीहसेणे राया अण्णया कयाई एगूणगाणं पंचण्हं देवीसयाणं एगूणाइं पंच माइसयाइं आमंतेति, तते णं तासिं एगूणगाणं पंचण्हं देवीसयाणं एगूणाइं पंच माइसयाइं सीहसेणेणं रण्णा आमंतियाइं समाणाइं सद्दालंकारविभूसिताइं जहाविभवेणं जेणेव सुपइट्टे णगरे जेणेव सीह० राया तेणेव उवागच्छंति, तते णं से सीहसेणे राया एगूणगाणं पंचदेवीसयाणं एगूणगाणं पंचमाइसयाणं कूडागारसालं आवसहं दलयति, तते णं से सीहसेणे राया कोडुंबियपुरिसे सदावेति ता एवं व०-गच्छह णं तुम्हे देवा० विउलं असणं० उवणेह, सुबहुं पुप्फवत्थगंधमल्लालंकारं च कूडागारसालं साहरह, तते णं ते कोडुंबिया तहेव जाव साहरंति, तते णं तासिं एगूणगाणं पंचण्हं देवीसयाणं एगूणगाइं पंच माइसयाइं जाव सद्दालंकारविभूसियाइं तं विपुलं असणं० सुरं च० आसादेमाणाइं गंधवेहि य नाडएहि य उवगिज्जमाणाइं २ विहरंति, तते णं से सीहसेणे राया अड्ढरत्तकालसमयंसि बहूहिं पुरिसेहिं सद्धिं संपरिवुडे जेणेव कूडागारसाला तेणेव उवागच्छति ता कूडागारसालाए दुवाराइं पिहेति ता कूडागारसालाए सद्गतो समंता अगणिकायं दलयति तते णं तासिं एगूणगाणं पंचण्हं देवीसयाणं एगूणगाइं पंच माइसयाइं सीह० रण्णा आलीवियाइं समाणाइं रोयमाणाइं० अत्ताणाइं असरणाइं कालधम्मणा संजुत्ताइं, तते णं से सीहसेणे राया एयकम्मे० सुबहुं जाव समज्जिणित्ता चोत्तीसं वाससयाइं परमाउं पाल-यित्ता कालमासे कालं किच्चा छट्ठीए पुढवीए उक्कोसबावीससागरोवमट्ठितीएसु उववण्णे, से णं तओ अणंतरं उवट्ठित्ता इहेव रोहीडए णगरे दत्तस्स सत्थवाहस्स कण्हसिरीए भारियाए कुच्छिसि दारियत्ताए उववण्णे, तते णं सा किण्ह-सिरी णवण्हं मासाणं जाव दारियं पयाया सुकुमालसुरूवं, तते णं तीसे दारियाए अम्मापितरो निवत्तबारसाहियाए विउलं असणं० जाव मित्त० नामधेज्जं करेति होउ णं दारिया देवदत्ता नामेणं, तते णं सा देवदत्ता पंचधाईपरिग-हीया जाव परिवड्ढति, तते णं सा देवदत्ता दारिया उम्मुक्कबालभावा जोवणेणं रूवेणं लावण्णेणं जाव अतीव उक्किट्ठा उक्किट्टसरीरा जाया यावि होत्था, तते णं सा देवदत्ता दारिया अण्णया कयाई ण्हाया जाव विभूसिया खुजाहिं जाव परिविक्खत्ता उप्पि आगासतलगंसि कणगतिंदूसएणं कीलमाणी विहरति, इमं च णं वेसमणदत्ते राया ण्हाते जाव विभूसिते आसं दुरूहेति ता बहूहिं पुरिसेहिं सद्धिं संपरिवुडे आसवाहणियाए णिज्जायमाणे दत्तस्स गाहावइस्स गिहस्स अदूरसामंतेणं वीतीवयति, तते णं से वेसमणे राया जाव वीतीवयमाणे दारियं उप्पि आगासतलगंसि जाव पासति ता देवदत्ताए दारियाए रूवेण य जोवणेण य लावण्णेण य जायविम्हए कोडुंबियपुरिसे सदावेति ता एवं व०-कस्स णं देवाणुप्पिया! एसा दारिया किं च नामधिजेणं?, तते णं ते कोडुंबिया० वेसमणरायं करतल० एवं व०-एस णं सामी! दत्तस्स सत्थवाहस्स धूया कण्हसिरीए भारियाए अत्तया देवदत्ता णामं दारिया रूवेण य जोवणेण य लावण्णेण य उक्किट्ठा उक्किट्टसरीरा, तते णं से वेसमणे राया अस्सवाहिणियाओ पडिणियत्ते समाणे अब्भितरट्ठाणिजे पुरिसे सदावेति ता एवं व०-गच्छह णं तुम्हे देवा०! दत्तस्स धूयं कण्हसिरीए अत्तयं देवदत्तदारियं जुवरण्णो भारियत्ताए वरेह जइवि य सा सयंरज्जसुंका, तते णं ते अब्भितरट्ठाणिजा पुरिसा वेसमणरण्णा एवं वुत्ता समाणा हट्ट० करयल० जाव पडिसुणंति ता ण्हाया जाव सुद्धप्पावेसाइं० संपरिवुडा जेणेव दत्तस्स गिहे तेणेव उवागया, तते णं से दत्ते सत्थवाहे ते पुरिसे एजमाणे पासति ता हट्ट० आसणाओ अब्भुट्ठेति ता सत्तट्टपयाइं अब्भु(पच्चु)ग्गते आसणेणं उवनिमंतेति ता ते पुरिसे आसत्थे वीसत्थे सुहासणवरगते एवं व०-संदिसंतु णं देवाणु०! किमागमणपओयणं?, तते णं ते रायपुरिसा दत्तं सत्थवाहं एवं व०-अम्हे णं देवा०! तव धूयं कण्हसिरीए अत्तयं देवदत्तं दारियं पूसणंदिस्स जुवरण्णो भारियत्ताए वरेमो तं जति णं जाणसि देवा०! जुत्तं वा पत्तं वा सलाहणिज्जं वा सरिसो वा संजोगो ता दिज्जउ णं देवदत्ता भारिया पूसणंदिस्स जुवरण्णो भण देवाणु०! किं दलयामो सुंके?, तते णं से दत्ते अब्भितरट्ठाणिजे पुरिसे एवं व०-एतं चेव णं देवाणुप्पिया! ममं सुंके जं णं वेसमणे राया मम दारियाणिमित्तेणं अणुगिण्हइ ते ठाणेजपुरिसे विउलेणं पुप्फवत्थगंधमल्लालंकारेणं सक्कारेति० ता पडिविसज्जेति, तते णं ते ठाणिज्जपुरिसा जेणेव वेसमणे राया तेणेव उवा० ता वेसमणस्स रण्णो एतमट्ठं निवेदंति, तते णं से दत्ते गाहावती अण्णया कयाई सोहणंसि तिहिकरणदिवसणक्खत्तमुहुत्तंसि विउलं असणं० उवक्खडावेति ता मित्तनाति० आमंतेति जाव पायच्छित्ते सुहासणवरगते तेणं मित्त० सद्धिं संपरिवुडे तं विउलं असणं० आसादे० एवं च णं विहरति जिमितभुत्तुत्तरागते आयंते० तं मित्तणाइ० विउलगंधपुप्फजावअलंकारेणं सक्कारेति० ता देवदत्तं दारियं ण्हायं जाव विभूसियसरीरं पुरिससहस्सवाहिणिं सीयं दुरूहेति ता सुबहुमित्त० जाव संपरिवुडे सद्धिइटीए जाव नाइयरवेणं रोहीडगं णगरं मज्झंमज्झेणं जेणेव वेसमणरण्णो गिहे जेणेव वेसमणे राया तेणेव उवागच्छति ता करयल० जाव वद्धावेति ता वेसमणरण्णो देवदत्तं दारियं उवणेति, तते णं से वेसमणे राया देवदत्तं दारियं उवणीतं पासित्ता हट्ट० विउलं असणं० उवक्खडावेति ता मित्तनाति० आमंतेति० जाव सक्कारेति० ता पूसणंदिकुमारं देवदत्तं दारियं च पट्टयं दुरूहेति ता सेयापीतेहिं कलसेहिं मज्जावेति ता वरनेवत्थाइं करेति ता अग्गिहोमं करेति पूसणंदिकुमारं देवदत्ताए पाणिं गिण्हावेति, तते णं से वेसमणे राया पूसणंदिस्स कुमारस्स देवदत्ताए सद्धिइटीए जाव रवेणं महया इड्ढिसक्कारसमुदएणं पाणिग्गहणं कारवेति ता देवदत्ताए अम्मापियरो मित्त० जाव परियणं च विउलं असणं० वत्थगन्धमल्लालंकारेण य सक्कारेति० ता पडिविसज्जेति, तते णं से पूसणंदिकुमारे देवदत्ताए दारियाए सद्धिं उप्पि पासाय० फुट्ट० बत्तीस० उवगेज जाव विहरति, तते णं से वेसमणे राया अण्णया कयाई कालधम्मणा संजुत्ते नीहरणं जाव राया जाए पूसणंदी, तते णं से

पूसणंदी राया सिरीए देवीए मायाभत्ते यावि होत्था कट्टाकल्लि जेणेव सिरी देवी तेणेव उवा० त्ता सिरीए देवीए पायवडणं करेति सतपागसहस्सपागेहिं तेहेहिं अग्निभावेति अट्टिसुहाए मंस० तया० चम्म० रोमसुहाए चउव्विहाए संवाहणाए संवाहावेति सुरहिणा गन्धवट्टएणं उव्वट्टावेति त्ता तीहिं उदएहिं मज्जावेति, तं०-उसिणोदएणं सीओदएणं गन्धोदएणं, विउलं असणं० भोयावेति सिरीए देवीए ण्हायाए जाव पायच्छित्ताए जाव जिमियभुत्तुत्तरागयाए ततो पच्छा ण्हाति वा भुंजति वा उरालाई माणुस्सगाई भोगभोगाई भुंजमाणे विहरति, तते णं तीसे देवदत्ताए देवीए अण्णया कयाई पुव्वरत्तावरत्त० कुडुंबजागरि० इमे एयारूवे अज्झत्थिते० एवं खलु पूसणंदी राया सिरीए देवीए माइभत्ते जाव विहरति तं एएणं वक्खेवेणं नो संचाएमि अहं पूसणंदिणा रण्णा सद्धिं उरा० भुंजमाणी विहरित्तए तं सेयं खलु ममं सिरीं देविं अग्निप्पओगेण वा सत्थ० विसप्पओएण वा मंतपयोगेण वा जीवियाओ ववरोवेत्ता पूसणंदिणा रण्णा सद्धिं उरा० भुंजमाणीए विहरित्तए एवं संपेहेति त्ता सिरीए देवीए अंतराणि य० पडिजागरमाणी २ विहरति, तते णं सा सिरी देवी अण्णया कयावि मज्जाती(प्र०वी)ता विरहियसयणिज्जंसि सुहप्पसुत्ता जाया यावि होत्था इमं च णं देवदत्ता देवी जेणेव सिरी देवी तेणेव उवागच्छति त्ता सिरीं देवीं मज्जावीतं विरहियसयणिज्जंसि सुहप्पसुत्तं पासति त्ता दिसालोयं करेति त्ता जेणेव भत्तघरे तेणेव उवा० त्ता लोहदंडं परामुसति त्ता लोहदंडं तावेति त्ता तत्तं समजोतिभूतं फुल्लकिसुयसमाणं संडासएणं गहाय जेणेव सिरी देवी तेणेव उवा० त्ता सिरीए देवीए अवाणंसि पक्खिवेति, तते णं सा सिरी देवी महता सद्देणं आरसित्ता कालधम्मणा संजुत्ता, तते णं तीसे सिरीए देवीए दासचे-डीओ आरसियसहं सोच्चा निसम्म जेणेव सिरी देवी तेणेव उवा० त्ता देवदत्तं देविं ततो अवक्कममाणिं पासति जेणेव सिरी देवी तेणेव उवा० त्ता सिरीं देविं निष्पाणं निच्चेट्टं जीवविप्पजटं पासति हा हा अहो अकज्जमितिकट्टु रोयमाणीओ० जेणेव पूसणंदी राया तेणेव उवा० त्ता पूसणंदिरायं एवं व०-एवं खलु सामी ! सिरी देवी देवदत्ताए देवीए अकाले चैव जीवियाओ ववरोविया, तते णं से पूसणंदी राया तासिं दासचेडीणं अंतिए एयमट्टं सोच्चा निसम्म महया मातिसोएणं अप्फुण्णे समाणे परसुनियत्तेविव चंपगवरपायवे धसत्ति धरणीयलंसि सव्वंगेहिं सण्णिवडिते, तते णं से पूसणंदी राया मुहुत्तंतरेणं आसत्थे समाणे बहूहिं राईसरजावसत्थवाहेहिं मित्त० जाव परियणेण य सद्धिं रोयमाणे सिरीए देवीए महता इड्ढीसक्कारसमुदएणं नीहरणं करेति त्ता आसुरुत्ते देवदत्तं देविं पुरिसेहिं गेण्हावेति त्ता एतेणं विहाणेणं वज्झं आणावेति, तं एवं खलु गोतमा ! देवदत्ता देवी पुरा जाव विहरति, देवदत्ता णं भंते ! देवी इतो कालमासे कालं किच्चा कहिं गच्छिहिति कहिं उव्वज्जिहिति ?, गोतमा ! असीतिं वासाइं परमाउं पालयित्ता कालमासे कालं किच्चा इमीसे रयणप्पभाए पुढवीए उव्वज्जिहिइ संसारो वणस्सति० ततो अणंतरं उव्वट्टित्ता गंगपुरे नगरे हंसत्ताए पच्चायाहिति से णं तत्थ साउणिएहिं वधिते समाणे तत्थेव गंगपुरे सेट्टि० बोही सोहम्मे महाविदेहे० सिज्झिहिति०, णिक्खेवो । २९ ॥ इति देवदत्ताध्ययनं ९ ॥ जति णं भंते ! समणेणं भगवता० दसमस्स उक्खेवो । एवं खलु जम्बू ! तेणं कालेणं० वद्धमाणपुरे णामं नगरे होत्था विजयवड्ढमाणे उज्जाणे माणिभदे जक्खे विजयमित्ते राया तत्थ णं धणदेवे नामं सत्थवाहे होत्था अड्ढे० पियंगू भारिया अंजू दारिया जाव सरीरा समोसरणं परिसा जाव पडिगया, तेणं कालेणं० जेट्टे जाव अडमाणे विजयमित्तस्स रण्णो गिहस्स असोगवणियाए अदूरसामंतेणं वीइवयमाणे पासति एगं इत्थियं सुक्खं भुक्खं निम्मंसं किडिकिडिभूयं अट्टिचम्मावणद्धं णीलसाडगणियत्थं कट्टाई कलु-णाई वीसराई कूवमाणिं पासित्ता चिंता तहेव जाव एवं व०-सा णं भंते ! इत्थिया पुव्वभवे का ? वागरणं-एवं खलु गोतमा ! तेणं कालेणं० इहेव जंबुदीवे दीवे भारहे वासे इंदपुरे णामं नगरे तत्थ णं इंददत्ते राया पुढवीसिरी णामं गणिया वण्णओ, तते णं सा पुढवीसिरी गणिया इंदपुरे नगरे बहवे राईसरजावप्पभियओ चुण्णप्पओगेहि य जाव अभिओगित्ता उरालाई माणुस्सगाई भोगभोगाई भुंजमाणी विहरति, तते णं सा पुढवीसिरी गणिया एयकम्मा० सुबहुं पाव जाव समजिणित्ता पणतीसं वाससताइं परमाउं पालयित्ता कालमासे कालं किच्चा छट्टीए पुढवीए उक्कोसे० णेरइत्ताए उव्वण्णा, सा णं तओ उव्वट्टित्ता इहेव वद्धमाणे नगरे धणदेवस्स सत्थवाहस्स पियंगुभारियाए कुच्छिसि दारि-यत्ताए उव्वण्णा, तते णं सा पियंगुभारिया णवण्हं मासाणं दारियं पयाया नामं अंजूसिरी सेसं जहा देवदत्ताए, तते णं से विजए राया आसवा० जहेव वेसमणदत्ते तहेव अंजू पासति णवरं अप्पणो अट्टाए वरेति जहा तेतली जाव अंजूए दारियाए सद्धिं उप्पि जाव विहरति, तते णं तीसे अंजूए देवीए अण्णया कयाई जोणीसूले पाउब्भूते यावि होत्था, तते णं से विजए राया कोडुंबियपुरिसे सदावेति त्ता एवं व०-गच्छह णं तुब्भे देवाणुप्पिया ! वद्धमाणपुरे नगरे सिंघा० जाव एवं वयह-एवं खलु देवाणु० ! विजय० अंजूए देवीए जोणिसूले पाउब्भूते जो णं इच्छति वेज्जो वा जाव उग्घोसेंति तते णं ते बहवे वेज्जा य० इमं एयारूवं० सोच्चा निसम्म जेणेव विजए राया तेणेव उवा० अंजूए देवीए बहूहिं उप्पत्तियाहिं० बुद्धीहिं परिणामेमाणा इच्छंति अंजूए देवीए जोणिसूलं उव्वसामित्तए नो संचाएंति उव्वसामित्तए० तते णं ते बहवे वेज्जा य० जाहे नो संचाएंति अंजूए देवीए जोणिसूलं उव्वसामित्तए० ताहे संता तंता परितंता जामेव दिसं पाउब्भूता तामेव दिसं पडिगता, तते णं सा अंजू देवी ताए वेयणाए अभिभूया समाणी सुक्का भुक्खा निम्मंसा कट्टाई कलुणाई वीसराई विलपति, एवं खलु गोतमा ! अंजू देवी पुरा० जाव विहरति, अंजू णं भंते ! देवी इओ कालमासे कालं किच्चा कहिं गच्छिहिति कहिं उव्वज्जिहिति ?, गोतमा ! अंजू णं देवी नउइं वासाइं परमाउं पालयित्ता कालमासे कालं किच्चा इमीसे रयणप्पभाए पुढवीए णेरइयत्ताए उव्वज्जिहिइ एवं संसारो, जहा पढमे तहा णेयव्वं जाव वणस्सती० सा णं ततो अणंतरं उव्वट्टित्ता सव्वओभदे नगरे मयूरत्ताए पच्चायाहिति, से णं तत्थ साउणिएहिं वधिते समाणे तत्थेव सव्वओभदे नगरे सेट्टिकुलंसि पुत्तत्ताए पच्चायाहिति, से णं तत्थ उम्मक्क० तहारूवाणं थेराणं अंतिए केवलं बोहिं बुज्झिहिति पव्वज्जा सोहम्मे, ततो देवलोगाओ आउक्खएणं० कहिं गच्छिहिति कहिं उव्वज्जिहिति ?, गोतमा ! महाविदेहे जहा पढमे जाव सिज्झिहिति जाव अंतं काहिति । एवं खलु जंबू ! समणेणं जाव संपत्तेणं दुहविवागाणं दसमस्स अज्झयणस्स अयमट्टे पं०, सेवं भंते ! २ । ३० । इति अंजूसुताध्ययनं १० ॥ इति प्रथमः श्रुतस्कंधः १ ॥ ॥ ॥ तेणं कालेणं० रायगिहे नगरे गुणसिलए चेइए सुधम्मे समोसढे जंबू जाव पज्जु-वासमाणे एवं वयासी-जइ णं भंते ! समणेणं जाव संपत्तेणं दुहविवागाणं अयमट्टे पं० सुहविवागाणं भंते ! समणेणं जाव संपत्तेणं के अट्टे पं० ?, तते णं से सुहम्मे अणगारे जंबू अणगारं एवं व०-एवं खलु जंबू ! समणेणं जाव संप-त्तेणं सुहविवागाणं दस अज्झयणा पं० तं०-सुवाहू भहनंदी य, सुजाए य सुवासवे । तहेव जिणदासे य, धणपती य महब्बले ॥ ३ ॥ भहनंदी महचंदे वरदत्ते । जति णं भंते ! समणेणं जाव संपत्तेणं सुहविवागाणं दस अज्झ- (१३८)

यणा पं० पढमस्स णं भंते ! अज्झयणस्स सुहविवागाणं जाव संपत्तेणं के अट्टे पं०?, तते णं से सुहम्मं० जंबू अणगारं एवं व०-एवं खलु जंबू ! तेणं कालेणं० हत्थिसीसे णामं णगरे होत्था रिद्धं०, तस्स णं हत्थिसीसस्स णगरस्स बहिया उत्तरपुरच्छिमे दिसीभागे एत्थ णं पुप्फकरंडए णामं उज्जाणे होत्था सञ्चोउयं०, तत्थ णं कयवणमालपियस्स जक्खस्स जक्खायतणे होत्था दिद्धे०, तत्थ णं हत्थिसीसे णगरे अदीणसत्तू नामं राया होत्था महया०, तस्स णं अदीणसत्तूस्स रण्णो धारिणीपामोक्खं देवीसहस्सं ओरोहे यावि होत्था, तते णं सा धारिणी देवी अण्णया कयाई तंसि तारिसिगंसि वासभवणंसि सीहं सुमिणे० जहा मेहजम्मणं तहा भाणियव्वं सुबाहुकुमारे जाव अलंभोगसमत्थं यावि जाणेंति अम्मापियरो पंच पासायवडंसगसयाइं कारेंति अब्भुग्गयं० भवणं एवं जहा महब्बलस्स रण्णो णवरं पुप्फचूलापामोक्खाणं पंचण्हं रायवरकण्णगसयाणं एगदिवसेणं पाणिं गेण्हावेंति तहेव पंचसइओ दाओ जाव उप्पि पासायवरगते फुट्टं० जाव विहरति, तेणं कालेणं० समणे भगवं० समोसरणं० परिसा निग्गया अदीणसत्तू निग्गते जहा कूणिए सुबाहुवि जहा जमाली तहा रहेणं णिग्गते जाव धम्मो कहिओ राया परिसा य पडिगता, तते णं से सुबाहु कुमारे समणस्स भगवओ० धम्मं सोच्चा निसम्म हट्टं० उट्टाए० जाव एवं वयासी-सहहामि णं भंते ! निग्गंथं पावयणं० जहा णं देवाणुप्पियाणं अंतिए बहवे राईसरजाव नो खलु अहं०, अहं णं देवा० अंतिए पंचाणुव्वतियं सत्तसि-क्खावतियं (दुवालसविहं) गिहिधम्मं पडिवज्जामि, अहासुहं०, मा पडिबंधं०, तते णं से सुबाहु समणस्स० अंतिए पंचाणुव्वतियं सत्तसिक्खावतियं गिहिधम्मं पडिवज्जति, तमेव रहं दुरूहति जामेव० दिसं पा० तामेव० पडिगते, तेणं कालेणं० जेट्ठे अंतेवासी इंदभूती जाव एवं व०-अहो णं भंते ! सुबाहुकुमारे इट्ठे इट्ठरूवे कंते० पिए० मणुण्णे० मणामे० सोमे सुभगे पियदंसणे सुरूवे बहुजणस्सविय णं भंते ! सुबाहु कुमारे इट्ठे० सोमे० साहुजणस्सविय णं भंते ! सुबाहु कुमारे इट्ठे इट्ठरूवे जाव सुरूवे, सुबाहुणा भंते ! कुमारेणं इमा एयारूवा उराला माणुसरिद्धी किण्णा लद्धा किण्णा पत्ता किण्णा अभिसमण्णागया के वा एस आसी पुव्वभवे ?, एवं खलु गोतमा ! तेणं कालेणं० इहेव जंबुदीवे दीवे भारहे वासे हत्थिणाउरे णामं णगरे होत्था रिद्धं०, तत्थ णं हत्थिणाउरे णगरे सुमुहे णामं गाहावती अट्ठे०, तेणं कालेणं० धम्मघोसा णामं थेरा जातिसंपण्णा जाव पंचहिं समणसतेहिं सद्धिं संपरिवुडा पुव्वाणुपुव्वि चरमाणा गा० दूइज्ज० जेणेव हत्थिणापुरे णगरे जेणेव सहस्संबवणे उज्जाणे तेणेव उवा० त्ता अहापडिरूवं उग्गहं उ० संजमेणं तवसा अप्पाणं भावेमाणा विहरंति, तेणं कालेणं० धम्मघोसाणं थेराणं अंतेवासी सुदत्ते नामं अणगारे उराले जाव लेस्से मासंमासेणं खममाणे विहरति, तते णं से सुदत्ते अणगारे मासखमणपारणगंसि पढमपोरिसीए सज्झायं करेति जहा गोतमसामी ज(त)हेव सुहम्मं(दत्ते) धम्मघोसे थेरे आपुच्छति जाव अडमाणे सुमुहस्स गाहावतिस्स गिहं अणुपविट्ठे, तते णं से सुमुहे गाहावती सुदत्तं अणगारं एज्जमाणं पासति त्ता हट्टतुट्ठे आसणाओ अब्भुट्ठेति पायपीढाओ पच्चोरुहति त्ता पाउयाओ ओमुयति एगसाडियं उत्तं० सुदत्तं अणगारं सत्तट्ठपयाइं पच्चुग्गच्छति तिक्खुत्तो आया-हिणं पयाहिणं करेइ त्ता वंदति नमंसति त्ता जेणेव भत्तघरे तेणेव उवागच्छति त्ता सयहत्येणं विउलेणं असणपाणं० पडिलाभेस्सामीति तुट्ठे, तते णं तस्स सुमुहस्स गाहावदस्स तेणं दव्वसुद्धेणं दायगसुद्धेणं पडिगाहगसुद्धेणं तिविहेणं तिकरणसुद्धेणं सुदत्ते अणगारे पडिलाभिते समाणे संसारे परिक्कीकते मणुस्साउए निबद्धे गिहंसि य से इमाइं पंच दिव्वाइं पाउब्भूताइं तं०-वसुहारा वुट्ठा दसद्ववण्णे कुसुमे निवतिते चेलुक्खेवे कते आहताओ देवदुंदुभीओ अंतरावि-य णं आगासंसि अहो दाणमहोदाणं घुट्ठे य०, हत्थिणाउरे सिंघाडगजावपहेसु बहुजणो अण्णमण्णस्स एवं आइक्खइ०-धण्णे णं देवा० ! सुमुहे गाहावती जाव तं धण्णे णं देवाणु० सुमुहे गाहावई, तते णं से सुमुहे गाहावती बहूइं वाससताइं आउयं पालेति त्ता कालमासे कालं किच्चा इहेव हत्थिसीसए णगरे अदीणसत्तूस्स रण्णो धारिणीए देवीए कुच्छिसि पुत्तत्ताए उववण्णे, तते णं सा धारिणी देवी सयणिज्जंसि सुत्तजागरा २ ओहीरमाणी २ तहेव सीहं पासति सेसं तं चेव जाव उप्पि पासादे विहरति, तं एवं खलु गोतमा ! सुबाहुणा इमा एयारूवा मणुस्सरिद्धी लद्धा०, पभू णं भंते ! सुबाहुकुमारे देवाणु० अंतिए मुंडे भवित्ता आगाराओ अणगारियं पव्वइत्तए ?, हंता पभू, तते णं से भगवं गोयमे समणं भगवं० वंदति नमंसति त्ता संजमेणं तवसा अप्पाणं भावेमाणे विहरति, तते णं से समणे भगवं० अण्णया कयाई हत्थिसीसाओ णगराओ पुप्फगउज्जाणाओ कतवणमालजक्खायतणाओ पडि० त्ता बहिया जणवयवि हारं विहरति, तते णं से सुबाहु कुमारे समणोवासए जाते अभिगयजीवाजीवे जाव पडिलाभेमाणे विहरति, तते णं से सुबाहुकुमारे अण्णया कयाई चाउदसट्टमुद्धिपुण्णमासिणीसु जेणेव पोसहसाला तेणेव उवा० त्ता पोसहसालं पमज्जति त्ता उच्चारपासवणभूमिं पडिलेहति त्ता दब्भसंथारगं संथारेइ दब्भसं० दुरूहति अट्टमभत्तं पगेण्हति पोसहसालाए पोसहिए अट्टमभत्तिए पोसहं पडिजागरमाणे विहरति, तए णं तस्स सुबाहुस्स कुमारस्स पुव्वरत्तावरत्त-काले धम्मजागरियं जागरमाणस्स इमे एतारूवे अज्झत्थिते० धण्णा णं ते गामागरजावसण्णिवेसा जत्थ णं समणे भगवं महावीरे विहरति, धण्णा णं ते राईसर० जे णं समणस्स० अंतिए मुंडा जाव पव्वयंति, धण्णा णं ते राईसर० जे णं समणस्स० अंतिए पंचाणुव्वतियं जाव गिहिधम्मं पडिवज्जंति, धण्णा णं ते राईसर० जे णं समणस्स० अंतिए धम्मं सुणेंति तं जइ णं समणे भगवं महावीरे पुव्वाणुपुव्वि जाव दूइज्जमाणे इहमागच्छेज्जा जाव विहरिज्जा तते णं अहं समणस्स० अंतिए मुंडे भवित्ता जाव पव्वएज्जा, तते णं समणे भगवं महावीरे सुबाहुस्स कुमारस्स इमं एयारूवं अज्झत्थियं जाव वियाणित्ता पुव्वाणुपुव्वि० दूइज्जमाणे जेणेव हत्थिसीसे णगरे जेणेव पुप्फगउज्जाणे जेणेव कयव-णमालपियस्स जक्खस्स जक्खायतणे तेणेव उवा० अहापडि० उग्ग० संजमेण जाव विहरति परिसा राया निग्गता, तते णं तस्स सुबाहुस्स कुमारस्स तं महया० जहा पढमं तहा निग्गओ धम्मो कहिओ परिसा राया पडिगता, तते णं से सुबाहु कुमारे समणस्स भगवओ० अंतिए धम्मं सोच्चा निसम्म हट्टं० जहा मेहो तहा अम्मापियरो आपुच्छति णिक्खमणाभिसेओ तहेव जाव अणगारे जाते ईरियासमिते जाव बंभयारी, तते णं से सुबाहु अणगारे सम-णस्स भगवओ महावीरस्स तहारूवाणं थेराणं अंतिए सामाइयमाइयाइं एक्कारस अंगाइं अहिज्जति त्ता बहूहिं चउत्थं० तवोविहाणेहिं अप्पाणं भावेत्ता बहूइं वासाइं सामण्णपरियागं पाउणित्ता मासियाए संलेहणाए अप्पाणं मूसित्ता सट्ठिं भत्ताइं अणसणाए छेदित्ता आलोइयपडिक्कंते समाहिं पत्ते कालमासे कालं किच्चा सोहम्मं कप्पे देवत्ताए उववण्णे, से णं ततो देवलोयाओ आउक्खएणं भवक्खएणं ठितिक्खएणं अणंतरं चयं चइत्ता माणुसं विग्गहं लभिहिति

ता केवल बोहिं बुझिहिति ता तहारूवाण थैराणं अंतिए मुंडे जाव पवइस्सति, से णं तत्थ बहूइं वासाइं सामण्णं पाउणिहिति ता आलोइयपडिक्कने समाहिं० कालगते सणकुमारे कप्पे देवत्ताए उववण्णे, से णं ताओ देवलोयाओ० ततो माणुस्सं पवज्जा बंभलोए माणुस्सं महासुक्के माणुस्सं आणए० ततो माणुस्सं आरणे माणुस्सं सवट्टसिद्धे, से णं ततो अणंतरं उवट्ठिता महाविदेहे जाव अट्ठाइं जहा दट्ठपतिण्णे सिज्झिहिति०, तं एवं खलु जंबू! समणेणं जाव संपत्तेणं मुहविवागाणं पढमस्स अज्झयणस्स अयमट्ठे पं० १३१॥ इति सुबाहुकुमाराध्ययनं १॥ वितियस्स उक्खेवओ, एवं खलु जंबू! तेणं कालेणं० उसभपुरे नगरे थूभकरंडे उज्जाणे धण्णो जक्खो धणावहो राया सरस्सती देवी सुमिण-दंसणं कहणं जम्मणं बालत्तणं कलाओ य जोवणं पाणिग्गहणं दाओ पासाद० भोगा य जहा सुबाहुस्स नवरं भदन्दी कुमारे सिरिदेवीपामोक्खाणं पंच सया० सामिस्स समोसरणं सावगधम्मं० पुव्वभवपुच्छा महाविदेहे वासे पुंडरीगिणी नगरी विजए कुमारे जुगबाहू तित्थंगरे पडिलाभिते मणुस्साउए बद्धे इह उप्पण्णे, सेसं जहा सुबाहुस्स जाव महाविदेहे सिज्झिहिति बुझिहिति मुच्चिहिति परिणिवाहिति सब्बदुक्खाणमंतं करेहि ॥ भद्रनन्द्यध्ययनं २॥ तच्चस्स उक्खेवओ, वीरपुरं नगरं मणोरमे उज्जाणे वीरकण्हमित्ते राया सिरि देवी सुजाए कुमारे बलसिरिपामोक्खाणं पंच सया सामी समोसरणं पुव्वभवपुच्छा उसुयारे नगरे उसभदत्ते गाहावती पुप्फदंते अणगारे पडि० इह उप्पण्णे जाव महाविदेहे सिज्झिहिति०॥ सुजाताध्ययनं ३॥ चउत्थस्स उक्खेवओ, विजयपुरं नगरं नंदणवणं उज्जाणं असोगो जक्खो वासवदत्ते राया कण्हा देवी सुवासवे कुमारे भद्रापामोक्खाणं पंच सया जाव पुव्वभवे कोसंबी नगरी धणपाले राया वेसमणभदे अणगारे पडिलाभिते इहं उप्पण्णे जाव सिद्धे ॥ सुवासवाध्ययनं ४॥ पंचमस्स उक्खेवओ, सोगंधिया नगरी नीलासोगे उज्जाणे सुकालो जक्खो अपडिहओ राया सुकण्हा देवी महचंदे कुमारे तस्स अरह-दत्ता भारिया जिणदासो पुत्तो तित्थयरागमणं जिणदासपुव्वभवो मज्झमिया नगरी मेहरहो राया सुधम्मो अणगारे पडिलाभिते जाव सिद्धे ॥ जिनदासाध्ययनं ५॥ छट्ठस्स उक्खेवओ, कणगपुरं नगरं सेतासोयं उज्जाणं वीरभदो ज-क्खो पियचंदो राया सुभदा देवी वेसमणे कुमारे जुव(प्र० ग)राया सिरिदेवीपामोक्खाणं पंच सया तित्थगरागमणं धणवती जुव(प्र० ग)रायपुत्ते जाव पुव्वभवे मणिवया नगरी मित्तो राया संभूयविजए अणगारे पडिलाभिते जाव सिद्धे ॥ धनपत्त्यध्ययनं ६॥ सत्तमस्स उक्खेवओ, महापुरं नगरं रत्तासोगं उज्जाणं रत्तपाओ जक्खो बले राया सुभदा देवी महब्बले कुमारे रत्तवतीपामोक्खाणं पंच सया तित्थगरागमणं जाव पुव्वभवो मणिपुरं नगरं णागदत्ते गाहा-वती इंदद(प्र० पु)त्ते अणगारे पडिलाभिते जाव सिद्धे ॥ महाबलाध्ययनं ७॥ अट्ठमस्स उक्खेवओ, सुघोसं नगरं देवरमणं उज्जाणं वीरसेणो जक्खो अज्जुणो राया तत्तावती देवी भदन्दी कुमारे सिरिदेवीपामोक्खाणं पंच सया जाव पुव्वभवे महाघोसे नगरे धम्मघोसे गाहावती धम्मसीहे अणगारे पडिलाभिते जाव सिद्धे ॥ भद्रनन्द्यध्ययनं ८॥ णवमस्स उक्खेवओ, चंपा नगरी पुण्णभदे उज्जाणे पुण्णभदो जक्खो दत्ते राया रत्तवती देवी महचंदे कुमारे जुव० सिरिकंतापामोक्खाणं पंच सया जाव पुव्वभवो तिगिच्छी नगरी जितसत्तू राया धम्मविरिए अणगारे पडिलाभिए जाव सिद्धे ॥ महाचन्द्राध्ययनं ९॥ जति णं० दसमस्स उक्खेवओ, एवं खलु जंबू! तेणं कालेणं० साएयं णामे नगरे होत्था उत्तरकुरू उज्जाणे पासमिओ जक्खो मित्तणंदी राया सिरिकंता देवी वरदत्ते कुमारे वरसेणापामोक्खाणं पंच देवीसया तित्थगरागमणं सावगधम्मं० पुव्वभवपुच्छा सयदुवारे नगरे विमलवाहणे राया धम्मरुई अणगारे एज्जमाणं पासति ता पडिलाभिते मणुस्साउए निबद्धे इहं उप्पण्णे, सेसं जहा सुबाहुस्स कुमारस्स चिंता जाव पवज्जा, कप्पंतरिओ जाव सब्बट्टसिद्धे ततो महाविदेहे जहा दट्ठपतिण्णे जाव सिज्झिहिति०। एवं खलु जंबू! सम-णेणं भगवया महावीरेणं जाव संपत्तेणं मुहविवागाणं दसमस्स अज्झयणस्स अयमट्ठे पण्णत्ते। सेवं भंते! २। ३२॥ वरदत्ताध्ययनं १०॥ द्वितीयः श्रुतस्कंधः ॥ विवागमुयस्स दो सुयक्खंधा दुहविवागो य मुहविवागो य, तत्थ दुहविवागे दस अज्झयणा एकसरगा दसमु चेव दिवसेसु उदिसिज्जंति, एवं मुहविवागे, सेसं जहा आयास्स १३३॥ इइ विवागमुयमेकारसमं अंगं समत्तं ॥ इत्यारसशिलायामुत्कीर्णं पादलिप्तपुरे श्रीसिद्धाद्रितलहट्टिकागतश्रीविर्धमानजैनागममंदिरे

इति महागोपमहामाहनमहानिर्यामकमहासार्थवाहचतुस्त्रिंशदतिशयवचरमतीर्थकरभगवन्महावीरशासने श्रीसुधर्मगणधर १ आर्यश्रीजम्बू २ प्रभव ३ गय्यभव ४ यशोभद्र ५ संभूतिविजय ६ स्थूलभद्र ७-सुहस्ति ८ सुस्थित-मुप्रतिबुद्ध ९ इन्द्रदिक्ष १० दिक्ष ११ सिंहागिरि १२ वज्रम्बामि १३ (चंद्र) १४ आर्यरथ १५ पुण्यगिरि १६ फल्गुमित्र १७ धनगिरि १८ शिवभूति १९ भद्र २० नक्षत्र २१ रक्ष २२ नाग २३-जेहिल २४ विष्णु २५ कालकाचार्य २६ संपलित-भद्र २७ वृद्ध २८ संघपालित २९ हस्ति ३० धर्म ३१ सिंह ३२ धर्म ३३ जम्बू ३४ नंदिक ३५ देशिगणि ३६ स्थिरगुप्त ३७ कुमारधर्म ३८ सूर्यश्वरपट्टप्रभाकर-श्रीदेवर्द्धिशमाश्रमणैः ३९ पुस्तकीकृतार्हतसिद्धान्तेषु श्रीआचारांगप्रभृतीन्येकादशांगानि शोधितानि च त्रिकालाबाधिताविच्छिन्नप्रभावशालि श्रीजैनसौधैकस्तम्भायमान श्रीकोटिकगणवज्रीशाखाचान्द्रकलश्वेता-म्बरतपोगच्छीयाचार्यानन्दसागरसूत्रिणा श्रीवीर २५१० विक्रम २०४० शक १९०५ इसु १९८४ तमवर्षे आपादकृष्णपक्षान्तिमदिवसशनिवारे श्रीआगमोद्धारकाचार्यदेवस्य जन्मवासरे पुनर्मुद्रितानि ॥